

Consello da Cultura Galega  
Comisión de Igualdade

LIÑA DO TEMPO

<http://www.culturagalega.org/album/>

# As mulleres na Historia

6.0- 25/02/2009

5.0 | 12/03/2008

4.0 | 19/06/2007

3.0 | 14/11/2006

2.0 | 05/04/2006

1.0 | 02/12/2005



CONSELLO  
DA CULTURA  
GALEGA

**GALICIA**

# MEDIEVO

- Século IV: Exeria percorre occidente, recolle datos e escribe libros de viaxes.
- As familias con posibilidades económicas fundan mosteiros de mulleres, crean así lugares axeitados para as súas fillas solteiras.
- Ata o século X danse casos de comunidades monásticas mixtas rexidas por abade e abadesa.
- A condesa Ilduara Eriz desenvolve as actividades que farán dela unha das principais e máis cualificadas aristócratas galegas dos séculos IX e X.
- Século X: Desde mediados de século as mulleres non poden testificar nos xuízos e nos documentos déixase de facer referencia a elas. A idade de casamento para as mulleres é de 12 anos, a dos homes 14. O afán por enclaustrar as mulleres eclesiásticas é crecente. Elabóranse escritos en que o corpo das mulleres se identifica coa contaminación.
- Século XII: Reino de Galicia, participación activa da raíña Urraca neste proxecto xunto co arcebispo Xelmírez e o conde de Traba, preceptor do rei Alfonso VII. En 1105: as mulleres gozan de estatuto de veciñanza pleno (Fuero de Santiago); hai presenza de mulleres no traballo artesanal con diferenza salarial respecto dos homes e a favor destes; as viúvas acceden ao traballo dos esposos, se entran nun gremio, están sometidas ás mesmas normas que os homes, sempre e cando permanezan viúvas ou casen con homes do gremio. Presenza de mulleres nos movementos de protesta pública. Primeiras composicións literarias en galego.
- Século XIII: Vive María Balteira, soldadeira que exerce o seu traballo nos reinos de Castela, Galicia e Al-Andalus.
- Século XIV: Guerra entre Enrique II e Pedro I de Trastámara na que Galicia participa activamente nun ou noutro bando. Movementos comunais contra os señores nas vilas e nas cidades galegas. A peste negra invade Galicia, alto índice de mortalidade. Presenza de mulleres nos movementos de protesta pública; destaca María Castaña, muller traballadora dun gremio en Lugo. En 1360, Pedro I xura a declaración de Cantanhede, na que afirma que un ano antes casara con Inés de Castro, esta declaración outórgalle o rango de «raíña despois de morta».
- Século XV: Primeira sublevación irmandiña (1431). Guerra irmandiña (1465-1469). Enfrontamento de Pardo de Cela cos Reis Católicos. Presenza de mulleres nos movementos de protesta pública.

## Século XVI

- Imposición do castelán como idioma escrito nos mosteiros, conventos, na vida legal, etc.
- 1520: Nace en Pontedeume Isabel de Castro y Andrade.
- 1525: Fúndase a Universidade de Santiago de Compostela.
- 1528: Constitúese o Reino de Galicia en Santiago de Compostela.
- 1533: O 11 de xaneiro, a Xunta de Goberno do Novo Reino de Galicia acorda a creación das provincias da Coruña e Tui.
- 1573: Perda dos dereitos de arribada do comercio de América.
- 1575: Primeiro auto de fe da Inquisición.
- 1577: Proceso inquisitorial de María Rodríguez en Tui.
- 1589: Defensa das costas galegas fronte aos ataques ingleses; destaca María Pita.
- 1596: Isabel Barreto conclúe a súa expedición en Manila.

## Século XVII

- De novo as costas galegas están ameazadas por corsarios e piratas, as mulleres volven ser protagonistas da súa defensa, como é o caso de María Soliña en Cangas.
- 1610: Introdúcese no Barbanza o cultivo do millo.
- 1622: Galicia compra o dereito a voto en Cortes.
- 1626: Ana de Castro é declarada feiticeira, mentireira e adiviñadora pola Santa Inquisición.
- 1633: Constrúese unha armada galega para a defensa da costa.
- 1650: Lucía Fidalgo pasa polo seu cuarto proceso inquisitorial.
- 1651: Ana de Castro volve ser xulgada pola Inquisición.
- 1685: Instálase en Sada a primeira industria téxtil destinada a producir velas para os navíos da armada.

## Século XVIII

- Tres ilustrados galegos abordan a defensa das mulleres nalgũa das súas obras: Vicente do Seixo e os frades Feijoo e Martín Sarmiento.
- A ilustrada María Teresa Caamaño queima a súa produción escrita.
- Participación de mulleres nos conflitos «ludistas».
- 1726: Creación do estaleiro real do Ferrol.
- 1734: Nace María Francisca de Isla y Losada, que tamén chegará a ser coñecida como «Perla negra», «Musa compostelá» ou «Filis».
- 1749: Comeza a construción da estrada A Coruña-Madrid.
- 1773-1779: Expedicións de familias galegas para poboar Uruguai e A Patagonia.
- 1784: Sociedades de Amigos del País, onde participan mulleres como membros activos.
- 1800: Publícase o primeiro xornal de Galicia: *El catón compostelano*.

## Século XIX

### 1801-1850

- 1803: Isabel de Zendala, recoñecida como a primeira enfermeira da saúde pública internacional, sae do porto da Coruña coa Real Expedición Filantrópica da Vacina da Varíola.
- 1806: Nace Juana María de Vega Martínez, quen chegará a participar activamente da vida política do Estado e dará corpo a novas propostas de carácter social.
- 1808: Constitución da Junta Suprema de Galicia.
- 1809: Fin da guerra da Independencia en Galicia. No mes de xuño, na batalla de Ponte Sampaio o pobo galego derrota o exército francés.
- 1815: Pronunciamento de Porlier na Coruña.

- 1820: Na Coruña, Acevedo secunda o levantamento de Riego, que dá comezo ao Trienio Liberal. A Coruña, Ferrol, Vigo e Pontevedra sublévanse contra o réxime absolutista. Nace en Ferrol Concepción Arenal.
- 1821: Nace na Coruña Virginia Felicia Auber y Noya.
- 1831: Nace na Coruña Amalia de la Rúa Figueroa y Somoza, chegará a ser «Condesa de Pardo Bazán», nai de Emilia Pardo Bazán e unha grande afeccionada á pintura.
- 1833: Coa reforma administrativa de Javier de Burgos ponse fin de xeito formal ao Reino de Galicia e pásase a unha organización en catro provincias (sete con anterioridade).
- 1834: División en partidos xudiciais. Betanzos perde a titularidade de provincia.
- 1835: Instalación definitiva das deputacións provinciais.
- 1835-1836: División en concellos.
- 1837: Nace Rosalía de Castro o 24 de febreiro.
- 1840: Inicio do Movemento Provincialista, que defende a especificidade de Galicia.
- 1842: Antolín Faraldo no seo da Academia Literaria de Santiago pronuncia a conferencia «Esclavas aún las mujeres, la filosofía del siglo XIX debe proclamar justa su emancipación».
- 1846: Manifiesto provincialista de Faraldo. Organízase a Junta Suprema do Reino de Galicia. Levantamento progresista e galeguista. Execución dos mártires de Carral.
- 1847: Debido á gran subida xeral nos prezos, traballadores e traballadoras amotínanse en Fefiñáns, Cee, Vilagarcía, Carril, Vigo, Redondela, Xuvia, Ortigueira, Santiago, Cambados, Cangas, Laxe, Rianxo e A Coruña.

## 1851-1900

- 1851: Nacen Concepción Sáiz (22 de maio), que chegará a ser unha pedagoga ligada á Institución Libre de Enseñanza, e Emilia Pardo Bazán (16 de setembro), que chegará a ser unha importante novelista e ensaísta, ambas as dúas ocúpanse da defensa e promoción das mulleres.
- 1852: Nace en Pontevedra Carmen Babiano Méndez Núñez, quen vai recibir desde ben pequena clases de debuxo e participará en varias exposicións de Arte Regional.
- 1853: Sae á rúa o *Faro de Vigo*. Nace en Santiago de Compostela Dolores Rodeiro Boado, quen chegará a ser a primeira escultora galega da que se ten noticia. Nace en Xanza (Valga) Teresa Bouchet y Blanco, quen chegará a participar en varias exposicións pictóricas.

- 1854: La Unión Liberal reivindica o «sufraxio universal comprensivo de todas as mulleres de probidade».
- 1858: Celébrase en Compostela a Exposición Agrícola, Industrial e Artística de Galicia, a única muller que participa nela é Genoveva de A. Rodríguez.
- 1860-1870: Debate feminista na prensa, liceos e ateneos. Aparición de publicacións como *Iris del bello sexo*, que contan con achegas de mulleres. Período de grande actividade literaria de mulleres. Os escritos de Concepción Arenal e Emilia Pardo Bazán reclaman reformas legais, dereitos sociais e políticos, mellora e promoción das mulleres e o acceso xeral á educación. No terreo da educación a obra de C. Arenal influirá en pedagogas como María Barbeito.
- 1861: Primeiros Xogos Florais de Pontevedra, estes e os seguintes contan sempre coa participación de escritoras galegas.
- 1862: Nace en Culleredo Sofía Casanova.
- 1863: Publícase a obra de Rosalía de Castro *Cantares gallegos*. Juana María de Vega, sendo visitadora das prisións, lelles ás reclusas cartas de Concepción Arenal.
- 1864: Congreso Agrícola Galego.
- 1866: Publícase *Las literatas*, artigo de Rosalía que afonda no debate sobre o papel e o valor social das mulleres.
- 1868: Nace en Valga Carolina Otero.
- 1870: Fúndase a Asociación para la Enseñanza de la Mujer.
- 1871: Resistencia e amotinamento contra as contribucións en varias localidades. Créase a Sociedad Cooperativa de Trabajadores 'El Ahorro'.
- 1872: Insurrección republicana-federal no arsenal de Ferrol entre os días 12 e 17 de outubro. Primeira folga xeral.
- 1873: Pérez Costales defende nas Cortes españolas o regulamento segundo o que Galicia debe ser gobernada por galegos. Inauguración do primeiro treito galego de ferrocarril Carril-Cornes. O grupo republicano federal de Compostela crea un proxecto para a nova organización de Galicia. Créase o Partido Republicano Federal Gallego. Folga obreira na Coruña.
- 1875: Celébrase a Exposición Regional de Santiago, á que concorren, entre outras, Concepción Diéguez, Dolores Rodríguez, Ramona Pérez Acedo e Purificación Rois; esta última é galardoada coa Medalla de Ouro, e Carmen Sancho obtén unha mención

honorífica. Nace María Vinyals y Ferrés en Mos, quen participará na polémica feminista do seu tempo.

- 1876: Convocatoria de certame literario en Ourense coa finalidade de premiar o mellor estudo crítico sobre a obra do frade Benito Jerónimo Feijoo. Morre na Coruña Narcisa Pérez Reollo.

- 1877: Entre outras, as pintoras Rosario Costeleiro, Elvira Mesa y Ramos e Adelaida Gracia Ramírez participan na Exposición Regional de Lugo.

- 1878: Sae á rúa *El Correo Gallego*. Creación da Escuela de Comercio para Mujeres.

- 1879: Fúndase o Centro Gallego de Montevideo. Inaugúrase o Ateneo de Ferrol. Tamén en Ferrol nace Aurora Rodríguez Carballeira.

- Ao longo da década dos oitenta o movemento obreiro vai desenvolver gran dinamismo.

- 1880: Nace na Coruña María Barbeito Cerviño.

- 1881: Restablecemento da liberdade de asociación.

- 1882: Sae á rúa *La Voz de Galicia*. A Federación de Trabaxadores de la Región Española celebra o seu Primeiro Congreso Comarcal Galaico de Trabaxadores.

- 1883: Vía ferroviaria que comunica Galicia co resto do estado.

- 1886: Nace na Coruña María Muñoz de Quevedo.

- 1887: Proxecto para o estado galaico elaborado pola Asamblea Federal de Lugo; recolle o dereito ao voto das mulleres «como electoras», non como elixibles. Congreso rexional sobre educación en Pontevedra.

-1888: Primeiras probas de iluminación eléctrica en Pontevedra. Créase na Coruña a Sociedad de Maestros de Obras y Talleres, de carácter patronal. A Deputación da Coruña outórgalle á pintora Pilar Pardiñas unha pensión para estudos de perfeccionamento do debuxo en Madrid.

- 1889: Nace na Coruña Syra Alonso e en Santiago de Compostela Juana Brocos.

- 1890: Constitúese en Compostela a Asociación Regionalista Gallega. Créanse as primeiras Agrupacións Socialistas e a súa publicación *El Obrero*. As cigarreiras da Coruña contan coa asociación Unión Tabaqueira. Celebracións do 1º de maio, que terán continuidade ata 1936. Nace Ernestina Otero Sestelo, representante da Asociación Libre de Enseñanza.

- 1891: Traslado dos restos de Rosalía a Bonaval. En Ferrol créase a primeira asociación socialista de Galicia.

- 1892: Emilia Pardo Bazán dirixe a Biblioteca da Muller.
- 1893: Morre a xurista, socióloga e pedagoga Concepción Arenal Ponte.
- 1894: Créase en Vigo a Federación de Trabaxadores.
- 1895: Nace en Santa María de Guísamo María Miramontes.
- 1896: Primeira proba de iluminación eléctrica en Vigo. Matriculada a primeira alumna na USC. Primeiros núcleos de sociedades de agricultores (Lerez - Pontevedra). A Exposición Regional de Lugo conta, entre outras, coa participación de Asunción de Andrés y Pérez, Concepción Constela de Vega e Herminia González Morales. Nace en Ponte Caldelas Placeres Castellanos.
- 1897: Primeiros núcleos asociacionistas de xente do mar (O Berbés - Vigo). A pintora galega Elina Molíns participa na Exposición Nacional de Bellas Artes de Madrid.
- 1898: Nace en Vigo Olimpia Valencia e na Coruña María Luz Morales.
- 1899: Primeiras organizacións de mulleres nos sextos da conserva (Vigo).

## Século XX

### 1901-1920

- Matriculadas tres estudantes en bacharelato.
- Formando parte do movemento obreiro créanse centros obreiros, ateneos populares, *casas del pueblo*. Consólidanse as organizacións de carácter patronal.
- 1901: Primeira muller licenciada na USC, obtén a licenciatura de Farmacia. En Tui constitúese a Unión Obrera Galaico-Portuguesa. Créanse as Cajas de Auxilio en Beneficio del Personal Obrero de la Fábrica de Tabacos.
- 1902: Nace Maruja Mallo en Viveiro, chegará a ser unha das pintoras galegas máis recoñecidas a nivel mundial. Morre na Estrada a literata Avelina Valladares.
- 1903: Créase a Escola Rexional Galega de Declamación, primeira compañía teatral dedicada á realización de espectáculos en galego. Nace Pilar Escudero, quen chegará a ser unha debuxante cunha técnica moi depurada. A pintora Dora Salgado remata os seus estudos na Escola de Artes e Oficios de Vigo.
- 1904: Nace en Carril María Araújo.

- 1905: Créase a Unión de Fabricantes de Conservas de la Ría de Vigo, primeira de carácter patronal.
- 1906: A Academia Galega creada na Habana un ano antes é recoñecida publicamente. Filomena Dato, Carmen Beceiro de Pato, Sofía Casanova, Emilia Calé, Sarah Lorenzana, Clara Corral Aller, Rita Corral Aller, Elisa Lestache de Caramelo, Ramona de la Peña y Salvador, Mercedes Vieito, Hipólita Moíño, Fanny Garrido, Carolina Michaëlis de Vasconcelos, Mercedes Tella e María Vinyals son nomeadas académicas correspondentes da RAG. Folgas no sector da construción da Coruña reclamando xornada laboral de oito horas e xornal mínimo de tres pesetas. María Araújo, que chegará a ser coñecida como «María a Guerrilleira», emigra coa súa familia a Cuba.
- 1907: Aumentan as organizacións agrarias. Nace en Noia María Mariño.
- 1908: Sae á rúa *El Progreso* de Lugo. Créase na Coruña a Unión Campesina.
- 1909: Gran mitin rexional en defensa da escola laica en Santiago de Compostela. A pintora e ceramista Oria García Ramírez é galardoada coa Medalla de Prata na Exposición Regional de Santiago de Compostela; nesta exposición participan tamén as pintoras Mercedes Noya, María Sanmartín e Elvira Santiso; esta última é galardoada coa Medalla de Ouro. A pintora Herminia Guerrero é premiada na exposición colectiva celebrada no Teatro Romea de Ferrol; outras participantes desta exposición son Mercedes Rey Pardo e Antonia Rodríguez.
- 1910: Felisa Elvira obtén o premio de fin de curso da Escola de Artes e Oficios de Ferrol. Nace en Castroverde Enriqueta Otero. Jesusa Prado chega a Cuba con 13 anos.
- 1911: Pilar Castillo comeza a súa actividade concertística.
- 1912: Desde a Sociedad Económica de Amigos del País de Santiago de Compostela desenvólvese unha incipiente promoción artística, con presenza de produción de mulleres; nos eventos convocados ata 1930 baixo o nome de «pintura gallega». A Exposición de Arte Regional celebrada na Coruña conta, entre outras, coa participación das pintoras María del Carmen Corredoyra y Ruíz de Baro e Severina Martínez Cereceda.
- 1914: Debuta a soprano lírica compostelá Ofelia Nieto.
- 1916: Na Coruña fúndanse as Irmandades da Fala. Loitas contra o sistema foral. Edítase o primeiro número de *A Nosa Terra*. A pintora Elena Olmos y Mesa participa no Concurso de carteis organizado pola revista *Blanco y Negro* e queda nos primeiros lugares.
- 1917: Celébrase unha nova Exposición de Arte Gallego na Coruña; participa, entre outras, Montserrat Rodríguez García.
- 1918: A Asamblea Nacionalista de Lugo recoñece no seu articulado a igualdade de dereitos para as mulleres e reclama a cooficialidade do galego e castelán. Créase na Coruña

a Sociedad de Obreras Cigarreras 'La Nueva Aurora'. Jimena e Elisa Fernández de la Vega licéncianse en Medicina pola Universidade de Santiago de Compostela. Ángela Ruíz Robles obtén praza de mestra en Santa Uxía de Mandiá (Ferrol).

- 1920: Matriculadas 427 alumnas en bacharelato. Aséntanse grandes organizacións sindicais como a UXT e a CNT.

## 1921-1940

- Entre os anos vinte e trinta nacen unha gran cantidade e variedade de asociacións de mulleres, tanto de carácter político como cultural, vencelladas ás Irmandades da Fala, ao PSOE, a organizacións anarquistas, a organizacións republicanas e ao PC.

- 1921: A cantante María Valverde trasládase a Cuba.

- 1922: Nace en Oza dos Ríos María Antonia Dans e na Coruña María Casares. Exposición de Arte Galega en Ferrol.

- 1923: Créase o Seminario de Estudos Galegos. As Irmandades da Fala fundan Escolas do Insiño Galego. Créase o Sindicato de Empacadoras 'La Razón'. María Luz Morales dirixe a revista *El Hogar y la Moda*. Exposición Regional de Bellas Artes de Santiago de Compostela, na que, entre outras, participan as pintoras María del Carmen Torres González, Lola García Rodríguez, Ermitas Prado, María Rivadulla e Asunción Nuñez. Celebración do Segundo Salón Ferrolano de Pintura, conta con carteis publicitarios elaborados por María Cabo.

- 1924: Luisa Cuesta Gutiérrez comeza a impartir clases na Universidade de Santiago de Compostela. Primeiras cooperativas leiteiras en Pontedeume.

- 1925: A pintora María Vázquez intégrase na Sociedade de Amigos del Paisaje Gallego na súa Sección de Pintura.

- 1926: O goberno de Primo de Rivera aproba o Decreto-lei de redención forzosa dos foros. Créase na Coruña o Sindicato de Obreros y Obreras Cerilleras 'Unión Cerillera'. Corona González publica os seus primeiros artigos en *A Nosa Terra*. María Espinosa Arias, Oria García Ramírez (Oria Moreno), entre outras, participan na Exposición de Arte Gallego de Santiago de Compostela. A debuxante Josefa Ferrón Sueiras remata os seus estudos na Escola de Artes e Oficios de Ferrol.

- 1928: Carmen Cornes emigra á Arxentina con 16 anos. As pintoras Dolores Maristany, Concha Vázquez Martínez e Concha Padín Botana participan na Exposición de Arte Regional de Vilagarcía de Arousa. A Deputación de Ourense concédelle unha subvención á pintora Vicenta Pérez López.

- 1929: María de los Dolores del Adalid y González Garrido é nomeada Académica de Honra da RAG. Sara Leirós Fernández ingresa no Seminario de Estudos Galegos. María Victoria Díaz Riva aproba as oposicións de ingreso no corpo de inspectores de educación primaria. Créase a Organización Republicana Gallega (ORGA). Francisca Morlán Ramos monta unha escola en Sada. A pintora María Taboada Deus expón a súa obra na Sociedade de Amigos do Arte de Santiago de Compostela.

- 1930: Matriculadas 956 alumnas en bacharelato. Créase na Coruña o Sindicato de Arte Textil 'La Primeira Coruñesa'. Reorganízase o Sindicato de Conserveras y Salazoneras 'El Porvenir Femenino' (logo chamado 'El Porvenir Social'). Pintoras como Carmen Liñares ou Carmen Novo de Alcaide levan a cabo unha exposición na Sociedade de Amigos do Arte de Santiago de Compostela. Nace en Santiago de Compostela Aida Méndez Miaja, que chegará a ser química e investigadora da USC e do CSIC.

- 1931: Os deputados galeguistas votan maioritariamente a favor do dereito ao voto das mulleres. Fundación do Partido Galeguista; conta no seu seo con grupos de mulleres organizados en Ourense e nas Mocedades, e cunha sección propia no voceiro desta formación política, *A Nosa Terra*. Constátase a participación de numerosas traballadoras nas manifestacións producidas neste momento de cambio de réxime político, moitas delas forman parte de sindicatos obreiros. Créanse na Coruña: o Sindicato de Chavoleras y Mozos de Campo 'El Progreso del Puerto', o Sindicato Profesional de Teléfonos, a Sección de Mandaderas do Sindicato de Profesiones Varias e o Sindicato de Jornaleros y Jornaleras Sastres 'La Progresiva'.

- 1932: Redacción do Estatuto de autonomía de Galicia. Publícase o *Método de lectura* de Xosefa Vilarelle. A Confederación Regional Galaica (CRG) conta con máis de dúas mil afiliadas. Créanse na Coruña o Sindicato de Construcciones Litográficas e o Sindicato de Porteros y Porteras. Créanse en Vigo o Sindicato de Modistas, Sastras e Sastres e tamén a Sociedad de Empacadoras. Fúndanse tamén o Sindicato de Estibadoras de Carril, a Sección de Aguja do Sindicato de Pescadores y Oficios Varios de Mugaros.

- 1933: Galicia é recoñecida como nación no IX Congreso das Minorías Nacionais de Europa organizado pola ONU. Créase na Coruña a Sección de Fábricas de Pastas, Galletas, Azafrán, Carameleros y Bomboneros do Sindicato de Industria de la Alimentación. Morre Elisa Fernández de la Vega.

- 1934: Isabel Ríos Lazcano afíliase ao Partido Comunista. A Asociación de Artistas da Coruña inaugura a súa sala de exposición cunha mostra da obra de cinco pintoras galegas baixo o título I Exposición de Artistas Femeninas.

- 1935: Inaugúrase o aeródromo de Lavacolla, nun futuro será Aeroporto de Santiago. Constitúese a Sección de Empacadoras de Bous do Sindicato de Industria Pesquera (SIP). Rita Amparo López Jean intégrase no Partido Galeguista. As pintoras Guillermina Búa e Concha Padín Botana, a debuxante e humorista Felisa Baudot e a escultora Ana Villa participan no II Certame do Traballo de Galicia de Ferrol, Sección Belas Artes.

- 1936: Apróbase o Estatuto de autonomía. Os grupos de mulleres farán unha campaña específica no seu apoio. Manifiesto de mulleres nacionalistas ourensás dirixido a todas as galegas. Rita Amparo López Jean preside a Agrupación Republicana Feminina da Coruña. A CRG conta con preto de 6000 afiliadas. Créanse o Sindicato de Conserveras y Atadoras 'La Reivindicadora' de Cangas, a Sociedad de Mariscadoras de Lourizán, a Sección Fábricas de Conservas y Atadoras do SIP de Aldán e a Sección Fábricas de Conserva y Manipuladoras de Pescado do Sindicato General de Trabajadores de Ribeira. Maruja Mallo participa na Exposición Internacional do Surrealismo celebrada en Londres e Pilar Escudero na Exposición de Arte Moderna da Coruña. Juana Capdevielle é paseada no Monte da Gándara.

- A sublevación militar fascista domina Galicia en poucas semanas. Entre as súas prácticas represivas máis sanguentas destacan os fusilamentos e paseos, dos que tamén serán vítimas as mulleres. Creación das Milicias Gallegas no bando republicano. Aparición dunha gran cantidade de fuxidos para organizar a resistencia e escapar da represión fascista, que contan coa participación de mulleres directamente na loita e no apoio ás partidas.

- 1937: Morre a debuxante Alejandra Murguía Castro.

- 1938: Carmen Corredoyra e Dolores Díaz Baliño son nomeadas académicas da Real Academia de Belas Artes «Nuestra Señora del Rosario», é a primeira vez que mulleres acadan este título. Pasamento de Carmen López-Cortón, mestra e escritora vinculada á Institución Libre de Enseñanza.

- 1939: Co inicio da Guerra Mundial exiliadas e exiliados galegos participarán na loita de resistencia, participación que ás veces vai ter como consecuencia a reclusión en campos nazis de traballo e exterminio. Inicio da guerrilla galega antifranquista. Paso de gran cantidade de refuxiados cara a Francia polos Pireneos, onde serán reclusos en campos construídos nas praias francesas. Pasamento de Joaquina García García, creadora do traxe de augas para as e os mariñeiros.

- 1940: Creación da Irmandade Galega en Bos Aires. Aparecen Hermandades de Labradores y Ganaderos, variante do sindicalismo vertical no agro.

## 1941-1960

- No traballo a prol de Galicia en América vai ser moi intensa a actuación de mulleres galegas, como Mariví Villaverde, Maruxa Seoane, Maruja Mallo.

- 1941: Aparición da revista *Galeuzca* en Bos Aires. Reaparición de *A Nosa Terra* no exilio. Julia Minguillón gaña o Premio Nacional de Bellas Artes con *A escola de Doloriñas*.

- 1942: Publícase a revista *Saudade* en México. Isabel Ponte é encadeada pola súa participación na reorganización clandestina da CNT.

- 1943: Créase na Coruña o comité CRG-CNT.

- 1944: Creación do Consello de Galiza en Montevideo. Creación do Bloque Nacional Republicano Galego en Francia.
- 1945: Emisión de Radio Pirenaica de Ribadeo a Tui. Publícase a revista *Posío*. Morre en Lugo a activista antifascista Urania Mella.
- 1946: Protestas obreiras coñecidas como «Folgas de brazos caídos».
- 1947: Primeiras emisións en galego da BBC.
- 1949: Francisca Herrera Garrido é elixida membro numerario da Real Academia Galega, é a primeira vez que unha muller obtén este nomeamento. Creación do Padroado Rosalía de Castro e de Cerámicas do Castro.
- 1950: Fundación da editorial Galaxia. O sete de xaneiro morre Castelao en Bos Aires.
- 1952: Sofía Casanova é nomeada Académica de Honra da Real Academia Galega.
- 1954: Inaugúrase o aeroporto de Peinador-Vigo.
- 1955: Nace en Silleda Marisa Soto.
- 1956: Primeiro Congreso da Emigración Galega en Bos Aires.
- 1958: Créase o grupo Brais Pinto en Madrid.
- 1959: Pasamento de Amalia Méndez Fernández, a creadora do Cine Quiroga en Marín.
- 1960: Morre na Coruña a pintora Florentina Brocos.

## 1961-1980

- 1961: Antía Cal, recoñecida vangardista na renovación pedagóxica, funda o Colexio Rosalía de Castro en Vigo. Nace na Coruña Belén Feliú.
- 1963: Inaugúrase o aeroporto de Alvedro na Coruña. O 17 de maio celébrase por vez primeira o Día das Letras Galegas, dedicado a Rosalía de Castro. Inauguración da Biblioteca Penzol en Vigo. Creación do Consello da Mocidade e do Partido Socialista Galego. Primeiras mobilizacións do estudantado universitario.
- 1964: Creación da Unión do Povo Galego.
- 1966: Estabilízanse as Comisións Obreiras que se veñen desenvolvendo desde 1962.
- 1967: Creación da Unión Sindical Obrera.

- 1968: Creación do Partido Comunista Galego e da súa sección de mulleres Movimento Democrático da Muller Galega (MDMG), estas últimas promoven a edición de revistas como *Alborada* ou *Muller en loita*.

- 1970: Naufraxio do petroleiro Policommander na ría de Vigo, que provocou un importante desastre ecolóxico. Esposas de traballadores da Bazán encérranse na igrexa de San Xulián para reclamar melloras laborais para eles.

-1971: Créase en Santiago de Compostela o Instituto da Lingua Galega.

- 1972: Creación da Organización Obreira. Creación de Galicia Socialista. Creación de Estudantes Revolucionarios Galegos (ERGA). A folga obreira do 10 de marzo é reprimida violentamente e remata con dúas mortes, para conmemorar esta xornada establécese o Día da Clase Obreira Galega.

- 1973: Creación das Comisións Labregas (CCLL).

- 1974: Pasamento da transportista Celia Rivas Casais, unha das poucas mulleres que desempeñaron esta tarefa na súa época.

- 1975: Creación do Sindicato Obreiro Galego (SOG). Creación da Unión de Traballadores do Ensino Galego (UTEG). Constitución da Asamblea Nacional Popular Galega (ANPG). Folga nas Pontes pola instalación da central eléctrica de ENDESA. Morre no exilio en Estados Unidos de Norteamérica a actriz libertaria galega Aurora Rodríguez, colaboradora das Sociedades Hispanas Confederales.

- 1976: Embarranca na ría da Coruña o petroleiro Urquiola e provoca grandes danos ecolóxicos. O 5 de xaneiro créase o Consello de Forzas Políticas. Creación do Sindicato Obreiro Galego. Creación da Intersindical Nacional Galega (INTG) coa confluencia de varios sindicatos sectoriais. Presentación en Compostela da Asociación Galega da Muller (AGM) no mes de maio; a partir de novembro comeza a coordinarse con outras organizacións feministas do estado. Mulleres vinculadas á USC articulan a Asociación Universitaria para o Estudio da Problemática da Muller e a Asociación Universitaria Pro Estudio do Problema da Muller.

- 1977: O catro de xaneiro apróbase a Lei sobre a reforma do Rexistro Civil, pola que se autoriza a imposición de nomes e a tradución dos xa rexistrados en calquera idioma do Estado. Creación do Museo do Pobo Galego. Mobilizacións agrarias. Mobilizacións labregas nas Encrobas. Folgas en diversos sectores produtivos e en diferentes puntos do país. Olivia Posse é ferida pola Garda Civil ao se opor á extracción de area en Baldaio. Creación da Asociación Democrática da Muller Galega (ADMG). Creación da Coordinadora Galega de Asociacións Legais de Muller, que agrupa a Asociación de Mulleres Traballadoras da Coruña, Asociacións de Mulleres do Fogar da Coruña, Asociación de Mulleres de Ferrol e Comarca, Asociación de Amas do Fogar das Travesas (Vigo), Asociacións de Amas do Fogar da Zona Centro de Vigo, Asociación de Mulleres do Barrio do Berbés (Vigo), Asociación de Mulleres do Barrio de Bonome-Mariñamansa

(Ourense), Asociación de Mulleres do Barrio do Couto (Ourense), Asociación de Mulleres de Ribadavia e Asociación Galega de Consumidoras. Créase a organización feminista Concepción Arenal. Publícase *A muller en Galicia*, libro teórico feminista de M.<sup>a</sup> Xosé Queizán.

- 1978: Constitúese en Santiago de Compostela a Academia de Ciencias galega. Folgas en diversos sectores produtivos e en diferentes puntos do país. Creación de: Feministas Independentes Galegas (FIGA), Asemblea Feminista de Lugo e as Secretarías da Muller de CC OO. Formando parte da Coordinadora de Organizaciones Feministas del Estado Español (COOFFEE), créase a Coordinadora Feminista Galega (CFG), esta organiza unha reunión da COOFFEE en Santiago de Compostela no mes de abril.

- 1979: En Vigo os núcleos feministas das MDM, FIGA, AGM e ADMG e mulleres independentes únense para crear a Coordinadora Feminista de Vigo. AGM edita un folleto sobre o «Día internacional de loita pola liberación homosexual».

- 1980: Referendo do Estatuto de autonomía. Galicia é recoñecida como nacionalidade histórica con competencias limitadas. Olga Gallego Domínguez ingresa na Academia da Historia. Créase unha Comisión da Muller da Asemblea Nacional-Popular Galega (AN-PG). Festival feminista en Vigo. María Xosé Queizán publica *Recuperemos as mans*. Falece en Vigo a pintora Carmen Rodríguez de Legísima.

## 1981-1985

- 1981: Primeiras eleccións ao Parlamento autonómico; a primeira lexislatura conta cun total de tres deputadas. Creación do Colectivo Feminista Independente Galego (CFG). Reorganización da Coordinadora Feminista de Vigo. No mes de xuño, tamén en Vigo, celébranse Xornadas de feministas independentes.

- 1982: Eleccións xerais, co triunfo do PSOE. Créanse as Secretarías da Muller da INTG. Encontros sobre o aborto na Coruña. Presentación pública da Asemblea de Mulleres da Coruña. A Coordinadora Feminista de Vigo (MDM, AGM e independentes), a Asemblea de Mulleres da Coruña, AGM-Santiago, AGM-Ferrol e AGM-Ourense xestionan unha táboa reivindicativa cos deputados do PCG, EG, UPG e PSG, para que estes presenten unha moción ao Parlamento Galego esixindo cursos de coeducación para ensinantes, creación de centros de información sexual e anticonceptiva, gardarías, lavandarías e comedores públicos nos barrios, traballo para as mulleres, regulamentación laboral para as traballadoras do servizo doméstico e comisións de control nas oficinas de emprego. No mes de marzo sae á rúa a revista feminista *A Saia. Boletín do Colectivo Feminista Independente Galego*.

- 1983: Decreto 222/1983, do 24 de novembro, polo que se asumen e asignan funcións e servizos traspasados polo Estado á comunidade autónoma en materia de protección á muller. Creación do Consello da Cultura Galega. As organizacións feministas Asemblea de Mulleres da Coruña, Asemblea de Mulleres de Pontevedra, AGM-Santiago, AGM-Ourense, Coordinadora Feminista de Vigo e Secretaría da Muller de CC OO elaboran unha «Carta

dos Dereitos da Muller Traballadora» na que se pide a eliminación de todas as formas existentes de discriminación legal e medidas que potencien a igualdade de trato e de oportunidades entre homes e mulleres. Creación de Grupos de Mulleres da Universidade (GMU). No mes de xaneiro publícase o segundo e último número de *A Saia*. Publícanse: o n.º 0 de *Andaina. Revista do Movemento Feminista -Galicia-*, o n.º 0 de *Festa da Palabra Silenciada*, o boletín *Lúa nova* da AGM-Ferrol, e, a Unidade didáctica *A Mulher hoje* da Asociación Sócio-Pedagógica Galega (AS-PG).

- 1984: Celébranse en Vigo as II Xornadas Feministas Galegas. Creación de Mulleres Nacionalistas Galegas (MNG) no seo do BNG. Un grupo de mulleres reúnen en Vigo comezando a dar forma ao xérmolo do Colectivo Feminista Donicela. Morre en Santiago de Compostela Jimena Fernández de la Vega. Pasamento de Aurora Liste Froján, leiteira e militante comunista. Pasamento de Eugenia Pereira Rodríguez, a primeira muller en acadar o título de Oficial de Farmacia na USC.

- 1985: Segunda lexislatura do Parlamento autonómico (gobierno PP); conta cunha deputada. O 24 de xullo a Televisión Galega emite por vez primeira. Créase o Seminario Galego de Educación para a Paz. Con motivo do centenario da morte de Rosalía celébrase en Compostela o Congreso Internacional de Estudos sobre Rosalía Castro e o Seu Tempo. Creación de Mulheres Livres. Créanse as primeiras organizacións de Mulleres Rurais.

## 1986-1990

- 1986: Olga Gallego ingresa na RAG. A Secretaría da Muller do SGTE organiza en Vigo as I Xornadas de Coeducación e Sexualidade. No mes de marzo e baixo o lema «Nen guerra que nos mate, nen paz que nos oprima», organizacións feministas galegas convocan unha acampada feminista pola paz na Alameda de Compostela. Mulheres Nacionalistas Galegas independízase do BNG. Créase en Vigo Alecrín, Grupo de Estudos sobre a Condición da Muller. No n.º 9 prodúcese un cambio de nome da revista *Andaina. Revista do Movemento Feminista Galego*. Publícase *Abrente. Voceiro da Secretaría da Muller da Intersindical Nacional dos Traballadores Galegos*. Xela Arias publica o seu primeiro libro de poemas. Morre en Vigo Mercedes Núñez.

- 1987: María Xosé Rodríguez Galdo é nomeada membro do Pleno do Consello da Cultura Galega (CCG), sendo a primeira muller que forma parte deste órgano (1987-1999). Día das Letras Galegas dedicado a Francisca Herrera Garrido. No mes de maio publícase o n.º 1 de *Area. Revista das Mulheres Nacionalistas Galegas*. Celébrase en Vigo a I Bienal de Artistas Galegas; trátase dunha convocatoria organizada por Alecrín e o Concello de Vigo que terá continuidade nos anos 1990, 1994 e 1997. Morre en Vigo Olimpia Valencia.

- 1988: Creación da Comisión Interdepartamental da Muller, da que forman parte as consellarías de Traballo e Benestar Social, Educación e Ordenación Universitaria, Cultura e Deportes, Traballo, Presidencia e Administración Pública, Sanidade, Industria, Comercio e Turismo, Agricultura, Pesca, Economía e Facenda. Apróbase o Primeiro plan de acción para a igualdade de oportunidades das mulleres (1988-1991). Iniciativa Lexislativa do PSG-EG para a creación do Instituto Galego da Muller; non foi aprobada. Primeira edición do

curso de posgrao Muller, Historia e Sociedade da USC-IDEGA que terá continuidade ata 1991. Celébranse en Compostela as Xornadas Feministas «Violencia machista» da Coordinadora de Organizacións Feministas do Estado Español (COOFFEE). Creación da Escola de Mulleres Simone de Beauvoir, da Secretaría da Muller da CXTG, da Asociación dos Colectivos da Muller Traballadora (CCMT-CXTG) e de Mulleres Progresistas en Vigo e Santiago de Compostela. Lourdes Méndez publica «*Cousas de mulleres*». *Campesinas, poder y vida cotidiana (Lugo 1940-1980)*, obra que pon en dúbida o patriarcado con igualdade de dereitos e os traballos antropolóxicos androcentricamente nesgados e que desembocan en xeneralizacións a-históricas e esencialistas sobre a Galicia rural e a cultura galega. A AS-PG publica *Análise sociolóxica da obra de Rosalía de Castro* de Francisco Rodríguez.

- 1989: Terceira lexislatura no Parlamento, que conta con nove deputadas. Iniciativa Lexislativa Popular «Nós mesmas» para a creación do Instituto Galego da Muller; non foi aprobada. Fórmase un equipo de traballo multidisciplinar na Facultade de Filosofía da USC. Lidia Senra é nomeada secretaria xeral do Sindicato Labrego Galego. Créanse os premios Alecrín-Alacrán, trátase dunha convocatoria con carácter anual da Asociación Alecrín. Creación de Mulleres Ensinantes do Rosa ao Violeta. Cambios no nome da revista *Area. Revista das Mulheres Nacionalistas Galegas*. Publícase en Edicións Xerais *Evidencias* de María Xosé Queizán. Morre en Lugo Enriqueta Otero, defensora dos dereitos civís e guerrilleira republicana. Morre na Habana María Araújo.

- 1990: Creación, pola confluencia de varios sindicatos de ensinantes de Galicia, do Sindicato de Traballadores do Ensino (STEG); desde o comezo conta con Secretaría da Muller. Creación do Centro da Muller Vagalume. Creación da Federación Galega de Mulleres Rurais. MNG publica a *Axenda Feminista Galega*, trátase dunha actividade que ten continuidade ata o ano 2006. Para conmemorar a data 8 de marzo, a Secretaría da Muller da CXTG-IN edita o libro *Traballadoras*. Cúmprense vinte anos do pasamento de María Barbeito na Coruña.

## 1991-1995

- Na década dos noventa vai ter lugar a creación das primeiras concellarías da muller, dos primeiros consellos municipais da muller e das primeiras vogalías de mulleres en asociacións de veciños.

-1991: Creación do Servizo Galego de Promoción da Igualdade do Home e da Muller (SGPIHOM) adscrito á Consellaría de Traballo e Benestar Social; o 10 de decembro este Servizo promove unha primeira Xornada sobre Formación e Traballo para as Mulleres; máis adiante adscríbese á Consellaría de Familia, Muller e Xuventude e pasa a chamarse Servizo Galego de Igualdade (SGAI). A Xunta de Galicia edita *Muller e emigración* de Pilar Cagiao Vila. Comeza a segunda época de *Andaina. Revista Galega de Pensamento Feminista*. Publícase en Edicións Xerais *Literatura galega da muller* de Carmen Blanco.

- 1992: Embarranca na ría da Coruña o petroleiro Mar Egeo con graves consecuencias para a ecoloxía costeira. Plan para a igualdade de oportunidades das mulleres galegas 1992-1994. O 7 de marzo o SGAI organiza en Lalín unha mesa redonda sobre a situación da muller en Galicia. Camino Noia, como representante da Universidade de Vigo, é membro do Pleno do CCG e permanece nel ata 1995. Os días 27, 28 e 29 de febreiro celébrase na Escola Universitaria de Maxisterio da USC o Simposio Internacional Muller e Cultura. Comeza a convocatoria do Premio 8 de Marzo de Ensaio da Secretaría da Muller da Confederación Xeral de Traballadores Galegos (CXTG). Creación do Grupo María Castaña. Creación da Comisión de Mulleres do BNG. Creación da Vocalía da Muller da Federación de AA.VV. Eduardo Chao (Vigo). Publícase en Edicións Xerais *Palabra de muller*, composto por traballos literarios de varias autoras. Cincuentenario da morte da pianista Pilar del Castillo Sánchez e da activista Rita Amparo López Jean.

- 1993: A cuarta lexislatura parlamentaria conta con dez deputadas. Creación da Consellaría de Familia, Promoción do Emprego, Muller e Xuventude. Creación do Premio Xohana Torres da Concellaría da Muller de Santiago de Compostela. Entre os días 5 e 9 de xullo realízase o curso de verán da USC titulado As mulleres e os cambios sociais e económicos. O Centro Galego de Arte Contemporánea de Santiago de Compostela abre as súas portas para dar cabida a unha exposición sobre Maruja Mallo. A oceanógrafa Ángeles Alvariño é distinguida coa Medalla de Prata de Galicia. Creación da Federación de Mulleres Progresistas. A obra de Úrsula Heinze *Culpable de asesinato* é galardoada co Premio Blanco Amor. A USC edita: *A vida das mulleres na Galicia medieval 1100-1500* de Carmen Pallares Méndez e as actas do *Simposio Internacional Muller e Cultura* de VV.AA. Centenario do falecemento de Concepción Arenal en Vigo.

-1994: No Parlamento galego créase a Comisión para a Igualdade e para os Dereitos das Mulleres (CIDM). O día 6 de xaneiro sae á rúa o primeiro número do xornal *O Correo Galego*. A Asociación Española de Investigación Histórica de las Mujeres (AEIHM) celebra en Compostela o seu II Coloquio Internacional Mujeres y Ciudadanía, la Relación de las Mujeres con los Ámbitos Públicos. Creación de Mulleres Antimilitaristas. Creación da Secretaría da Muller do Sindicato Labrego Galego. Creación da CIG pola confluencia entre CXTG-INTG, conta con Secretaría da Muller. Comézase a celebrar a data 24 de maio como Día Internacional da Muller Antimilitarista. Publícase o único número de *Rebelión. Revista das Mulheres Nacionalistas Galegas*.

- 1995: II Plan para a igualdade de oportunidades das mulleres galegas 1995-1997. O Auditorio de Galicia en Compostela acolle a exposición A Arte Inexistente. Artistas Galegas do Século XX; é a primeira vez que se leva a cabo unha revisión histórica das artistas galegas. A Semana de Filosofía de Pontevedra, organizada pola Aula Castelao de Filosofía, céntrase na relación «Filosofía e Xénero». Creación do colectivo Donas de Nós. Creación da Asemblea de Mulleres de Galiza Nova. Edicións Xerais publica *Nais, damas, prostitutas e feirantas* de Carmen Blanco e Nigra, da mesma autora, *O contradiscurso das mulleres*. Espiral Maior publica *Escrita da certeza. Por un feminismo optimista* de María Xosé Queizán. Pasamento da pintora Maruja Mallo en Madrid e da armadora Carmen Pérez García en Noia.

## 1996-2000

- 1996: A quinta lexislatura parlamentaria conta con 17 deputadas. Decreto 79/1996, do 29 de febreiro, sobre asunción da ampliación de medios producida polo Real decreto 91/1996, do 26 de xaneiro, de medios adscritos ós servizos da Administración do Estado traspasados á Comunidade Autónoma de Galicia polo Real decreto 2834/1983, en materia de protección á muller e a súa asignación á Consellaría de Familia, Muller e Xuventude. Desde o 29 de novembro Luz Pozo Garza fai parte da RAG. Pura Vázquez Iglesias recibe o Premio Trasalba. Xéstase a Asociación Mulleres Cristiás Galegas. A Xunta de Galicia publica *A prostitución no sur de Galicia* de VV.AA. A USC edita *Mujeres e institución universitaria en occidente* de VV.AA. Xerais publica *Álbum de Galicia. Os galegos pintados por si mesmos. A muller tradicional* de VV.AA. O Seminario de Estudos Galegos publica *As mulleres nas cantigas medievais* de Esther Corral Díaz. No mes de xullo publícase o n.º 0 de *Deliberadamente. Folha informativa de activismo feminista*, editada por MNG. Edítase o 1º número de *Unión Libre: Cadernos de Vida e Cultura*, dedicado integramente a mulleres e literatura. Morre en París María Casares, en Sada Francisca Morlán, en Lebosende Marisa Soto e na Coruña Carmen Pérez Gómez.

- 1997: O 17 de xuño apróbase no pleno do Parlamento os ditames propostos pola CIDM coas seguintes temáticas: política institucional, política laboral, servizos sociais, educación, cultura e medios de comunicación, saúde. Mulleres Progresistas convocan por vez primeira o Premio de Novela 8 de Marzo. GMU, CAF e USC organizan a 1ª Xornada de Muller e Economía na Facultade de Ciencias Económicas e Empresariais. Toma corpo a Coordinadora Unitaria de Apoio á Modificación da Lei do Aborto. Creación de: Mulleres Cristiás Galegas Exeria, Mulleres Xornalistas MUGACON, Noveluas-FEIN, Comisións da Muller CAF/CAE, Comisión da Muller da AMI. Publícase en Edicións Laiovento *Corpo de muller, Discurso, Poder, Cultura* de VV.AA. Edicións Xerais edita *As mulleres na historia* do Grupo María Castaña. O Patronato Rosalía de Castro, no cincuentenario da Fundación Rosalía de Castro, publica *Daquelas que cantan... Rosalía na palabra de once escritoras galegas*. Estréase a película *Inés de Portugal*, baseada na vida de Inés de Castro. Morre en Santiago de Compostela Belén Feliú e en Madrid Isabel Ríos.

- 1998: III Plan de igualdade de oportunidades das mulleres galegas 1998-2001. O 13 de maio publícase no DOG a creación da Comisión Asesora de Publicidade non Sexista. Decreto 377/1998, do 23 de decembro, polo que se establece o réxime xeral das axudas e subvencións da Consellaría de Familia e Promoción do Emprego, Muller e Xuventude en materia de medidas activas de emprego. Real decreto-lei 11/1998, do 4 de setembro, polo que se regulan as bonificacións de cotas á Seguridade Social dos contratos de interinidade realizados con persoas desempregadas para substituír a traballadores/as durante os períodos de descanso por maternidade, adopción e acollemento. A Deputación da Coruña entrega o I Premio Concepción Arenal. Creación do Feminario Teorías de la Diferencia na Universidade de Vigo. Creación da Asociación de Mulleres Lilith. No período lectivo (1998-1999) e, ao mesmo tempo que se fusionan, créase a Comisión da Muller EI-FER-Agir. Creación da Plataforma de Resposta contra as Agresións ás Mulleres. Edicións Laiovento publica *Misoxinia e racismo na poesía de Eduardo Pondal* de María Xosé Queizán. Edicións A Nosa Terra publica *Os labirintos do corpo. Manipulacións*

*ideolóxicas, saberes científicos e obras de arte.* María del Carmen Pallares Méndez publica a súa investigación sobre Ilduara Eriz, aristócrata galega do século X. Publícase *Recuperando a nosa historia* de MNG. Morre en Santiago de Compostela a cantante e actriz Maruxa Villanueva, en Monçao a dramaturga e tradutora Amparo Alvajar e en Arxentina a activista Carmen Cornes.

- 1999: Decreto 312/1999, do 11 de novembro, polo que se refunde a normativa vixente en materia de muller. Pilar Cagiao Vila é nomeada membro do Pleno do CCG e permanece nel ata 2003; esta mesma institución organiza, no mes de marzo, xunto coa Consellería de Familia, Promoción do Emprego, Muller e Xuventude a xornada A Muller na Cultura Galega, e publica *Textos para a historia das mulleres en Galicia* de VV.AA. Creación da Rede de Mediadoras. Creación do Foro de Brión, formado por feministas independentes. Créase Agir sindicato estudiantil que neste momento conta con Comissom de Mulheres. No mes de novembro as organizacións Alecrín, FIGA, Asamblea de Mulleres de Pontevedra, MNG e Mulheres Livres convocan un foro de debate sobre a violencia de xénero en Compostela. É galardoada co Premio Xohana Torres a obra de Mariluz González Parente e Marta Lombán Pazos *Nais xornaleiras e emigrantes*. Créase a colección Mulleres de Edicións A Nosa Terra. Publícase *Recuperando a nosa historia II. As rúas tamén teñem género* de MNG. A Asociación de Mulleres Xanela publica *Mestras de Redondela 1900-1945*. Cristina Pato publica o seu primeiro disco: *Tolemia*. Susana Seivane publica o seu primeiro disco: *Susana Seivane*. María Jesús Lago Rey é a terceira muller en acadar o cumio do Everest sen facer uso de osíxeno artificial.

- 2000: A sexta lexislatura parlamentaria conta con vinte deputadas. Un decreto refunde a normativa reguladora vixente en materia de familia, infancia e adolescencia. Modifícanse determinados artigos do Regulamento do Rexistro Civil en materia relativa ao nome e apelidos e a súa orde. Creación da Cátedra Caixa Nova de Estudos Feministas. Primeira edición do Máster Educación, Xénero e Igualdade da USC. Primeira edición do Máster Axentes de Igualdade de Oportunidades: Xénero e Educación da USC. Constitúese a comezos de abril a Coordinadora Nacional Galega da Marcha Mundial das Mulleres (MMM). Creación de Buserana e do Colectivo Violeta. Edicións Xerais de Galicia crea a colección As Literatas. Mercedes Peón edita o seu primeiro disco: *Isué*. Chegan a Galicia os *Diarios* de Syra Alonso. Pasamento da ebanista María Martínez Otero.

## Século XXI

### 2001-2005

- 2001: O 26 de xuño apróbase no pleno do Parlamento o ditame proposto pola CIDM, relativo ao mundo do traballo, condicións e características do mercado laboral. Lei 4/2001, do 31 de maio, reguladora da mediación familiar. Resolución do 14 de febreiro de 2001 pola que se crean os premios Galicia en Feminino e se aproban as bases para a súa concesión, modifícase por Resolución do 30 de xaneiro de 2004. O CCG organiza a mesa redonda Muller e Migración. O 27 de outubro Xohana Torres ingresa na RAG. Ángela Rodicio recibe dous galardóns: o Premio Galicia en Femenino e o Premio Galicia de

Comunicación. É galardoada co Premio Xohana Torres a obra de Susana Martínez Rodríguez *O pensamento feminista do economista compostelán Joaquín Díaz de Rábago (1837-1898)*. O Premio Dámaso Alonso de Investigación Filolóxica recae na obra de Mariña Albor Aldea *O Cancioneiro de son Afonso Sánchez. Edición e estudio* e queda como finalista *El mayor monstruo del mundo de Calderón de la Barca. Estudio textual* de María J. Caamaño Rojo. A obra de Marilar Aleixandre *Teoría do caos* é galardoada co Premio Xerais. Creación da Comissom Nacional da Mulher de NOS-UP. MNG publica *O evidente non existe I* de VV.AA.; Laivento, *A mulher no nacionalismo galego (1900-1936). Ideologia e realidade* de Noa Ríos Bergantinhos; e a USC e o CIS *Cuestiones actuales de sociología del género* de VV.AA. Pasamento da artista e empresaria Consuelo Liñeira García.

- 2002: O petroleiro Prestige afunde nas costas galegas e provoca un desastre ecolóxico de enormes dimensións. Decreto 249/2002, do 18 de xullo, polo que se modifica o Decreto 312/1999, do 11 de novembro, polo que se refunde a normativa existente en materia de muller. IV Plan de igualdade de oportunidades das mulleres galegas 2001-2005. Blanca Giménez Alonso, como representante da Fundación Penzol, é membro do Pleno do CCG e permanece nel ata 2008. O Premio de Narrativa Historias na Universidade recae na obra *O malfadado ano no que perdín a moza por culpa dun robot, porque as desgracias sempre veñen mal acompañadas* de Ana María Galego Gen. O Premio Xohana Torres recae na obra *Esquecidas pola historia. As mulleres compostelás entre finais do século XIX e o primeiro terzo do XX* de Herminia Pernas Oroza. A obra de Inma López Silva *Concubinas* é galardoada co Premio Xerais. Ánxeles Alvariño publica *España y la primera expedición científica oceánica, 1789-1794: Malaspina y Bustamante con las corbetas Descubierta y Atrevida*. Laivento edita *As mulleres escritoras (1860-1870). O xenio de Rosalía* de Celia María Armas García; MNG, *O evidente non existe II. Dende a igualdade, dende a diferença* de VV.AA. Cúmprense setenta anos da publicación do libro *Método de lectura* de Xosefa Iglesias Vilarelle, primeiro texto didáctico escrito en galego.

- 2003: Decreto 159/2003, do 31 de xaneiro, polo que se regula a figura do mediador familiar, o Rexistro de Mediadores Familiares de Galicia e o recoñecemento da mediación gratuíta. Orde do 5 de xuño de 2003 pola que se establece un programa de fomento da inserción laboral das mulleres vítimas de violencia doméstica. Creación do Observatorio de Publicidade no SGAI. A filóloga Rosario Álvarez é nomeada académica numeraria da RAG. Centenario da identificación da monxa Exeria como autora do libro *Itinerarium*, no que narra a súa viaxe a Oriente. O Premio Xohana Torres recae na obra *Voces da memoria. Galegas, exiliadas, emigradas e resistentes durante o réxime franquista* de Beatriz Graña Pérez. O Premio de Narrativa Historias na Universidade recae na obra *Singularis Domitilla* de Eva Moreda. Espiral Maior edita *Feminismo e coñecemento* de Carmen Adán; Edicións Xerais, *Alba de mulleres* de Carmen Blanco e *Escrita de mulleres. Doce ensaios arredor de Virginia Woolf* de VV.AA. Publícase na colección Biblioteca Gallega *As precursoras* de Aurora Marco. Morren en Vigo a escritora Xela Arias e a pintora Mercedes Ruibal.

- 2004: Resolución do 9 de febreiro de 2004 pola que se establecen as bases reguladoras que rexerán as axudas e subvencións para a creación de empresas e a integración laboral da muller como estímulo a mulleres emprendedoras de Galicia (programa Emega) e se procede á súa convocatoria. Resolución do 15 de decembro de 2004 pola que se establecen as bases

reguladoras que rexerán as axudas e subvencións a entidades locais e a entidades de iniciativa social para o desenvolvemento de programas destinados á promoción da muller e se procede á súa convocatoria. Decreto 78/2004, do 2 de abril, polo que se crea e regula o Observatorio Galego da Inmigración e da Loita contra o Racismo e a Xenofobia. O 15 de xuño apróbase no pleno do Parlamento o ditame proposto pola CIDM relativo á prostitución feminina. Lei 7/2004, do 16 de xullo, galega para a igualdade de mulleres e homes. Decreto 182/2004, do 22 de xullo, polo que se regulan os centros de información ás mulleres e se establecen os requisitos para o seu recoñecemento e funcionamento. Primeira edición do Máster en Educación en Igualdade de Xénero e Políticas de Igualdade da UVigo. Créase a colección As Letras das Mulleres, coeditada por Sotelo Blanco Edicións e polo SGAJ. O Premio Dámaso Alonso de Investigación Filolóxica recae na obra de María do Cebreiro Rábade Villar *As antoloxías de poesía en Galicia e Cataluña*. Encontro da MMM en Vigo. Publícanse: a obra de Begoña Marugán Pintos *Profesionalización das mulleres galegas* (Xunta de Galicia); *Racionalismo político e literario* de María Xosé Queizán (Edicións Xerais); *As palabras das fillas de Eva* de Teresa Moure (Editorial Galaxia); *Educación e socialización da muller na Galicia rural* de Rita Gradaílle Pernas (Edicións do Castro); *Outras voces, outros mundos. Mulleres inmigrantes e prostitución en Galicia* (Andaina e o Concello de Santiago de Compostela); *A muller, ¡Que cale! Raíces do antifeminismo* de Xosé Chao Rego (tresCtres); *A presenza das mulleres pintoras na arte galega 1858-1936* de Fernando Pereira Bueno (Edicións do Castro). Morre Luisa Villalta.

- 2005: Sétima lexislatura parlamentaria galega, presidida por Dolores Villarino e con vinte e cinco deputadas. Creación da Secretaría Xeral da Igualdade, o SGAJ intégrase no seu organigrama. Ánxela Bugallo Rodríguez forma parte do Pleno do CCG en virtude do seu cargo na Consellería de Cultura, e Helena Villar Janeiro faino como representante da Fundación Rosalía de Castro. Créase a Comisión de Xénero do CCG. Primeira edición do Máster de Xénero e Políticas de Igualdade da UDC. O grupo de investigación Muller e Política do Departamento de Ciencias Políticas e da Administración da USC comeza a articular xornadas arredor da data 8 de marzo. Ánxeles Cuña é elixida directora do Centro Dramático Galego (CDG). O Instituto Cervantes asina un convenio coa Real Academia Galega (RAG) para promover a presenza da lingua e da cultura de Galicia en todos os centros do Instituto. A obra de Teresa Moure *Herba moura* é galardoada co Premio Xerais e a de Dolores Ruíz Gestoso *Dentro da illa* co Premio Blanco Amor. Publícase na rede de internet o primeiro número da revista *Foeminas. Revista virtual de xénero da Casa da Muller do Concello de Lugo*. Desde o mes de decembro navega o *Álbum de Mulleres* na rede de internet. A Universidade da Coruña edita *Igualdade e discriminación de xénero na negociación colectiva sectorial en Galicia: vellas inercias e novos retos para a igualdade* de Celia Pereira Porto; Edicións Xerais, *Elas e o paraugas totalizador. Escritoras, xénero e nación* de Helena González; Baía Edicións, *O orballo da igualdade. Asociacionismo feminino progresista na cidade da Coruña* de Ana Romero Masiá e Carlos Pereira Martínez. O Grupo Achádeo estrea a obra *A confusión de María Balteira*, inspirada nesta destacada muller que viviu no século XIII en Galicia. Morre en San Diego Ángeles Alvariño, en Pontevedra María Victoria Moreno e en Ourense Paz Parada Pumar.

2006...

- 2006: É declarado Ano da Memoria. A Vicepresidencia da Igualdade e do Benestar fomenta o acceso á cotitularidade das mulleres nas explotacións agrarias co obxectivo de que as labregas, que comparten explotación, contén cos mesmos dereitos que os seus compañeiros titulares. Créase na Universidade de Santiago de Compostela o Centro de Investigacións Feministas e de Estudos de Xénero (CIFEX). Primeira edición do Programa Oficial de Posgrao Estudos de Xénero da UVigo. A RAG acorda que o Día das Letras Galegas 2007 será dedicado a María Mariño. Ramón Villares Paz, presidente do Consello da Cultura Galega, é nomeado académico numerario da RAG. María Bouza é nomeada presidenta da Academia Galega do Audiovisual e Pilar Comesaña xerente. Cristina Domínguez é nomeada directora do Centro Dramático Galego. O Premio Dámaso Alonso de Investigación Filolóxica recae na obra *El libro de Motes de Damas y Caballeros de Luis Milán. Edición crítica y estudio* de Isabel Vega Vázquez. Publícanse: *Sexo e lugar* de Carmen Blanco (Edicións Xerais); *A memoria esquecida: Peladas, presas, paseadas* de VV.AA (Andaina e Xunta de Galicia); *As mulleres na filosofía* de Inés Fernández Buján (Baía Edicións). Os primeiros textos publicados por Corona González en A Nosa Terra cumpren oitenta anos. Morre en Ourense a poeta Pura Vázquez Iglesias.

- 2007: É declarado Ano da Ciencia. O 13 de abril publícase no DOG a Lei do Traballo en Igualdade das Mulleres en Galicia. II Plan Galego de Inclusión Social 2007-2013. Apróbase o V Plan do goberno galego para a igualdade entre homes e mulleres 2007-2010. A Xunta de Galicia crea a Unidade Muller e Ciencia. Publícase o caderno n.º 1 da Unidade de Muller e Ciencia co título *As mulleres no sistema educativo de Galicia: situación actual*. Rosario Álvarez Blanco forma parte do Pleno do CCG en representación do ILG. Créase, por unha reformulación da Comisión de Xénero, a Comisión de Igualdade do CCG. Por proposta da Comisión de Igualdade do Consello da Cultura Galega, esta institución organiza no mes de xuño as Xornadas Xénero e Documentación e, no mes de decembro, Ano María Mariño: un Balance. O Día das Letras Galegas é dedicado a María Mariño. Primeira edición do Programa Oficial de Posgrao Educación, Xénero e Igualdade da USC. Créase na USC o Seminario Muller e Universidade (SMU). A obra de Rexina Rodríguez Vega *Cardume* é galardoada co Premio Xerais. Obras de artistas feministas dan corpo a *A batalla dos xéneros* no Centro Galego de Arte Contemporánea en Santiago. Alvarellos Editora publica a ata agora inédita obra de María Mariño *Más allá del tiempo*. MNG publican o seu *Caderno Lila. Luitadoras. O género da memoria*. A Universidade de Vigo publica *O reto da igualdade. Feminismo, xénero e universidade* de VV.AA.

- 2008: Cúmpanse 25 anos da creación do CCG. María Xosé Agra Romero e María Luísa Sobrino Manzanares son nomeadas membros do Plenario do CCG. Margarita Ledo Andión é nomeada membro da RAG. No mes de outubro celebrábase o VII Encontro Internacional da Marcha Mundial das Mulleres. II Encontro de Outras Voces Feministas en Panxón. A Xunta de Galicia crea os Premios Nacionais da Cultura Galega, constan de 10 categorías e dous galardóns son outorgados a mulleres: Margarita Ledo Andión (Cinema e Audiovisual) e Mercedes Peón (Música). A obra de Olga Gallego *Historia da Muller. Mulleres ourensás dos séculos XIV-XVIII* é galardoada co Premio Trasalba. A obra de Inma López Silva *Memorias da cidade sen luz* é galardoada co Premio Blanco Amor. A Secretaría Xeral de

Igualdade publica o primeiro número da revista *Xenia*. Publícase á traducción ao galego de *O segundo sexo* de Simone de Beauvoir.

# **TERRITORIO ESPAÑOL**

# MEDIEVO

- A vida conventual é escollida como lugar-refuxio por mulleres sobre todo pertencentes á nobreza e á burguesía e que non dispoñen de dote para casar axeitadamente. A cantidade de dote requirida para a entrada no convento é menor que a necesaria para casar.
- Nos conventos e abadías xeracións de mulleres exercen a tarefa de copiar e elaborar miniaturas ilustrando códices e salterios.
- Mulleres con oficios, entre outros moitos: carniceiras, ferraxeiras, fabricantes de redes, zapateiras, fabricantes de luvas, faixeiras, camiseiras, fabricantes de carteiras, sombreireiras, comadroas, esfoladoras, encadernadoras, pintoras, fiadeiras de seda, bordadoras, salgadeiras, campesiñas, lavadeiras, creadoras de ourives. Tamén algunhas mulleres son ás veces mestres gremiais.
- A anulación matrimonial e a posibilidade de ter novas nupcias están reservadas para casos de incapacidade de reprodución.
- Nos séculos V-XI a Lex Gotica permite que as mulleres dispoñan de propiedade. A maioría dos matrimonios son civís, comezan a realizarse tamén matrimonios eclesiásticos.
- No século VII existen mosteiros con seccións separadas para monxes e monxas unidas polo goberno dunha abadesa.
- Ata o século IX é común entre reis e nobres a práctica da polixinia.
- Século X: A monxa castelá Ende realiza unha serie de miniaturas para ilustrar un códice sobre a fin do mundo, as súas son cualificadas como obra mestra.
- Século IX: A igrexa comeza a elaborar as súas estratexias futuras para se inmiscir nas prácticas sexuais e matrimoniais da poboación.
- Século XI: Coa Reforma Gregoriana (1075) aumentan os referentes e referencias ás mulleres e ao corpo sexuado femia como símbolo de maldade.
- Século XII: A burguesía comeza a se configurar como unha clase distinta e diferenciada dos señores. O traballo comeza a ser definido como unha actividade pola que a cambio se recibe unha paga. Fórmanse e desenvólvense numerosas institucións educativas, unhas están ligadas á Igrexa, outras teñen un carácter máis independente. O alto clero goza de recoñecemento máxico-mítico baseándose na escritura e no ensino. A Igrexa ten as súas propias normas e conta con tribunais especiais. Coa imposición do matrimonio monogámico e indisoluble a Igrexa trata de moralizar os propios costumes eclesiásticos,

transformar a nobreza e someter o resto do pobo de Deus ao imperialismo eclesiástico. Aumento da participación das mulleres na vida social, espiritual e intelectual medieval como oíntes, lectoras, mecenas, transmisoras de grandes herdanzas e titoras.

- Século XIII: A formación das universidades supón o ordenamento, agrupación e xerarquización de oficios e unha redución das posibilidades educativas das mulleres.

## Século XIV

Existen dous modelos de ensino da Medicina no reino de Aragón: o das universidades cristián-escolásticas e o dos Estudos. Nas madrasas de Zaragoza, Toledo, Guadalaxara, Barcelona, etc. impártense estudos islámicos. Nas alxamas impártense estudos xudeus. Tense constancia de que nas universidades estudaban e ensinaban mulleres, cando menos na de Salamanca e na de Boloña.

## Século XV

- 1474: Isabel I é proclamada raíña de Castela en Segovia.

-1490: Morre Isabel de Villena, quen na súa obra literaria defende a dignidade das mulleres.

- 1499: A escritora e erudita Beatriz Galindo escribe *Comentarios sobre Aristóteles y notas sobre los antiguos griegos*.

## Século XVI

- Os autos de fe da Inquisición foron máis intensos no caso dos diferentes reinos da Península Ibérica que no resto dos territorios onde actuou.

- Reforma nos conventos de monxas coa aparición da clausura rigorosa.

-1515: Nace en Ávila Teresa de Xesús, que chegará a ser unha importante escritora mística e reformará a Orde do Carmelo.

- 1587: Oliva Sabuco de Nantes Barrera publica a primeira edición (acadará 8) da súa obra *Nueva filosofía de la naturaleza del hombre, no conocida ni alcanzada por los grandes filósofos antiguos, la cual mejora la vida y la salud humana*; nela discute os métodos da medicina oficial apoiándose nunha revisión das características da natureza humana e convida a entender e tratar os pacientes como un todo: corpo, mente e ánima.

## Século XVII

- Algunhas mulleres conseguen postos de relevancia e unha certa independencia nos territorios da coroa de Castela nas Indias.
- María de Zayas y Sotomayor (1590-1661) pronúnciase a favor da educación das mulleres e afirma que as almas non teñen sexo.
- No campo da astronomía adóptase o sistema copernicano.
- 1656: Nace en Sevilla Luisa Ignacia Roldán, quen chegará a ser a primeira escultora de recoñecido prestixio na arte española e a única artista distinguida co título de Escultora de Cámara do rei de España en dúas ocasións, con Carlos II e con Felipe V.

## Século XVIII

- Aparición dos salóns literarios vencellados ás ideas da Ilustración e presenza de mulleres nas Sociedades Económicas de Amigos del País.
- 1724: A dinastía borbónica funda na Cidade de México o primeiro convento para indíxenas de monxas cacicas de Corpus Christi.
- 1739: Publícase a obra de Benito Feijoo *La defensa de las mujeres*.
- 1741: Créase en Madrid a Congregación de Naturales y Originarios de Galicia, primeira institución coñecida creada pola emigración.
- 1749: Comeza a construción da estrada A Coruña-Madrid. Nace Josefa Amar y Borbón, unha das figuras máis destacadas da Ilustración española, que escribe un gran número de obras dedicadas a valorar o papel da muller na sociedade e a defender a súa igualdade de talentos co home.
- 1763: Créase en Cádiz o xornal de crítica social *La Pensadora Gaditana*, promovido por Beatriz Cienfuegos, publicouse ata 1764.
- 1781: Último auto de fe da Inquisición sevillana.
- 1784: María Isidra de Guzmán y de la Cerda é nomeada membro da Real Academia Española e, un ano máis tarde, obtén o título de Doutora en Filosofía e Letras Humanas.
- 1790: Publícase a obra de Josefa Amar y Borbón *Discurso sobre la educación física y moral de las mujeres*.

# Século XIX

## 1800-1850

- Arredor da intelectualidade republicana e federal de inspiración fourierista fórmanse pequenos núcleos que loitan pola emancipación das mulleres.
- 1807: Morre Josefa Jovellanos, escritora da lingua asturiana e promotora de obras sociais.
- 1810: Formación das Juntas Americanas, pródromo do movemento de liberación nas colonias españolas. Cortes de Cádiz.
- 1812: Promúlgase unha nova Constitución.
- 1814: Fernando VII revoga a Constitución de 1812 e restaura unha monárquica con poder absoluto. Volta á Inquisición.
- 1815: Pronunciamento de Porlier na Coruña a prol dun réxime liberal.
- 1820: Levantamento de Riego, que dá comezo ao Trienio Liberal.
- 1822: Aprobación do primeiro Código penal español.
- 1831: Morre aforcada Mariana Pineda ao ser condenada por bordar nunha bandeira liberal «Ley, Igualdad y Libertad».
- 1833: Reforma administrativa de Javier de Burgos. Comezan as guerras carlistas entre os que prefiren que o trono sexa ocupado por Carlos e os que prefiren que o ocupe Isabel II; esta última reina coa rexencia de María Cristina.
- 1839: Remate das guerras carlistas.
- 1845: Nace Dolors Monserdà, escritora feminista catalá que escribiu un dos textos considerados fundacionais do feminismo catalán: *Estudi feminista*.

## 1851-1900

- Anos 60-70: Primeiras tentativas sufraxistas. Inícianse os debates sobre o dereito universal á educación das mulleres, destaca a participación de E. Pardo Bazán e de Concepción Arenal.
- 1862: Nace Sofía Casanova.

- 1867: Nace Carmen de Burgos, *Colombine*, chegará a ser mestra, novelista, correspondente de guerra, militante feminista e republicana.
- 1868: Comezo do Sexenio Revolucionario. Goberno provisional cos seguintes logros: liberdade de reunión, liberdade de asociación e sufraxio universal directo e masculino.
- 1869: Fundación da Federación da Asociación Internacional dos Traballadores. Constitución para artellar o estado democrático con monarquía parlamentaria (Amadeo I de Saboya), segue as coordenadas da Constitución de 1855 nutrida de moderantismo pouco conservador e progresismo pouco liberal. Comezo de insurreccións republicanas. Concepción Arenal publica *La mujer del porvenir. Artículos sobre las conferencias dominicales para la educación de la mujer*.
- 1870: A raíña Isabel II abdica do trono español. Algunhas universidades admiten mulleres con permiso das autoridades competentes.
- 1871: As Cortes declaran anticonstitucional a Asociación Internacional do Traballo (AIT).
- 1872: Matrículase na Facultade de Medicina de Barcelona Elena Maseras Ribera; será así a primeira alumna desa universidade. Morre Juana de Vega.
- 1873: I República. Comisión para a Reforma do Código Penal na que participa Concepción Arenal. Abolición da escravitude. A Ley del Trabajo non fai referencia ás mulleres. Nace Rosa Sensat Vilá, como mestra chegará a defender a Escola Nova.
- 1874: Restauración da monarquía borbónica (véñse fraguando desde 1872). Decreto de disolución do núcleo obreiro marxista.
- 1875: O ministro de Fomento reabre a «cuestión universitaria», decreta que a docencia non pode contravir as ordes da igrexa e pon fin á liberdade de cátedra; un grupo de profesores, en desacordo co decreto, renuncian ás súas cátedras e fundan a Institución Libre de Enseñanza.
- 1877: Pasamento da literata Cecilia Böhl de Faber, *Fernán Caballero*.
- 1878: Nace Asunción Rincón Lazcano, que chegará a ser mestra e introducirá melloras no maxisterio español.
- 1879: O PSOE celebra o seu primeiro congreso na clandestinidade. O sindicalismo católico emprega estratexias de contención do movemento obreiro.
- 1881: Congreso obreiro de corrente anarquista en Barcelona. Creación da UGT. Creación da Federación de Trabajadores de la Región Española. Nace en Santander a futura pintora María Blanchard. Nace en Arijá a futura pintora Gloria Torner.

- 1882: Primeiro Regulamento de Higiene Especial nos prostíbulos. Primeiras doutoras en Medicina: Dolores Aleu, Martina Castells e Elena Maseras. Emilia Pardo Bazán publica *La tribuna*, que ten como protagonista unha obreira.
- 1883: A Lei de imprenta do 26 de xullo amplía o espazo de debate público. A Lei do 24 de xullo prohíbe o traballo das nenas menores de 7 anos e tamén o traballo nocturno ata os 17 anos. Créase a Escuela de Correos y Telégrafos.
- 1884: A pintora galega Juana Muñoz Zubiría participa na Exposición Nacional de Bellas Artes de Madrid. Nace María Bonet, en 1936, sendo mestra, colectivizará as súas terras e será obxecto da represión franquista.
- 1885: Despois da morte de Alfonso XII, o goberno de Sagasta recupera algúns dereitos da Constitución de 1869.
- 1887: Aprobación da Lei de asociaciones e da Lei de juicios por xurado.
- 1888: Nace Margarita Xirgú, que chegará a ser actriz e directora de escolas dramáticas. Nace Clara Campoamor, que se desenvolverá como avogada, sufraxista e deputada en Cortes. Nace Enriqueta García Infanzón, despois chamada *Eugenia Astur* e coñecida escritora asturiana.
- 1889: O Código civil consagra a discriminación legal das mulleres. A partir deste ano e ata 1892 a vixilancia dos prostíbulos recae nos gobernos locais.
- 1890: A representación do Estado español na Conferencia Internacional do Traballo de Berlín é a única asistente que non vota unha lexislación protectora para o traballo das mulleres.
- 1892: A vixilancia dos prostíbulos e da prostitución recae nos gobernos civís. Creación da Biblioteca de la Mujer dirixida por Emilia Pardo Bazán. A pintora pontevedresa Carolina Alavarría e a santiaguesa Carmen Torres y Plaza participan na Exposición Nacional de Bellas Artes.
- 1892-1910: Aparecen diferentes normativas que van regulamentando o marco en que se vai producir a presenza de mulleres nos institutos secundarios e mais na universidade.
- 1890: Sufraxio universal para os homes.
- 1893: Unha Real orde permite que as mulleres poidan efectuar a súa matrícula nos estudos de bacharelato sen ter que pedir autorización.
- 1897: No regulamento da Policía Minera prohíbese o traballo das mulleres no interior das minas. As pintoras galegas Elina Molíns, Clotilde López, Manuela Ulloa e María Alcalá participan na Exposición Nacional de Bellas Artes de Madrid.

- 1899: Morre Pilar Pascual Sanjuán, pedagoga, considerada como parte da primeira xeración de feministas do territorio.

-1900: Leis sociais sobre accidentes laborais, sobre a limitación no acceso ao traballo de mulleres e de nenos.

## Século XX

### 1901-1920

-1902: Nace en Paniza (Zaragoza) María Moliner, que desenvolverá unha importante tarefa filolóxica e lingüística.

-1904: Constitúese en Barcelona e na liña anarquista Solidaridad Obrera.

- 1905: Nace Federica Montseny Mañé, que chegará a ser escritora e oradora anarquista, formará parte da CNT e en 1936 será ministra de Sanidade. Nace Trinidad Revolto, que chegará a desenvolver actividade sindicalista e de secretaria da Unió de Dones de Catalunya.

- 1906: A artista galega María Gor Atienza participa na sección de arte decorativa da Exposición Nacional de Bellas Artes de Madrid.

- 1908: Nace Dolors Vives Rodón, que chegará a ser aviadora e fundadora do Aero Popular de Barcelona, tamén loitará na aviación republicana entre 1936-1939.

- 1909: Comeza a ter efecto a presenza das mulleres nas aulas dos institutos. Chega a Melilla Carmen de Burgos, *Colombine*.

- 1910: Revógase a necesidade de solicitar un permiso especial para que unha muller se poida matricular libremente na ensinanza universitaria oficial. Creación da CNT, vai ser o pilar do movemento sindicalista ata 1939.

- 1911: A moda da saia-pantalón chega a Madrid e tamén o fai o escándalo que provoca. Nace en Barcelona Mercedes Núñez.

- 1912: «Ley de la Silla», que impón aos patróns a obriga de proporcionar asentos ás mulleres empregadas en tendas e almacéns. As pintoras galegas Emilia Danet, María Escobar, Esperanza Enríquez, Rosario Garrido Casadevante e Elvira Santiso, entre outras, participan na Exposición Regional de Pintura Gallega celebrada en Madrid.

- 1913: Neutralidade do estado ante a Primeira Guerra Mundial.

- 1916: Emilia Pardo Bazán acada a primeira cátedra universitaria de España coa súa especialidade de Literatura Románica. A pintora galega Elena Olmos y Mesa participa no Concurso de carteis organizado pola revista *Blanco y Negro* e queda nos primeiros lugares.
- 1917: Folga xeral. Creación da Federación Anarquista Ibérica (FAI).
- 1918: Fúndase a Asociación Internacional de Mujeres de España. Morre a pintora modernista catalá Lluisa Vidal i Puig.
- 1920: Créase a Asociación Española de Mujeres Universitarias. Edítase en Madrid o xornal *La Voz de la Mujer*, dirixido por Consuelo González.

## 1921-1940

- Desde os anos 20 organizacións dereitistas e a Igrexa católica asumen a tarefa de desacreditar o feminismo, de promover loitas contra o deporte de competición, contra as novas modas no vestir e a frivolidade das mulleres. Tamén comezan a aparecer organizacións de mulleres co obxectivo de contrarrestar estas reaccións.
- 1921: A Cruzada de Mujeres Españolas protagoniza a primeira manifestación a prol do sufraxio nas rúas de Madrid no mes de maio. Nace Rosario Benavent, que participará nun grupo de acción anarquista en Barcelona e morrerá a causa dunha explosión. Nace Asunción Linares Rodríguez, que chegará a ser catedrática de Facultade de Ciencias e será a primeira muller que desempeña ese cargo en España. Morre Emilia Pardo Bazán.
- 1923: Primo de Rivera concede ás españolas quince postos na Asamblea Nacional. Juan de la Cierva fai voar o seu primeiro autoxiro.
- 1924: Concesión do voto ás mulleres xudicialmente libres por parte do goberno de Primo de Rivera. Nalgúns xornais madrileños comézanse a pór de moda os concurso de beleza feminina.
- 1925: A xurista Victoria Kent defende un procesado, é a primeira vez no estado que unha muller leva a cabo esta tarefa.
- 1926: Pacificación do protectorado marroquí. No mes de febreiro a Alianza Republicana non consegue romper con divisións internas. División entre PSOE e UGT: uns colaboran co réxime, outros piden unión cos republicanos. A CNT é ilegalizada ao tempo que os moderados perden forza fronte a anarquistas.
- 1927: O Decreto lei do 15 de agosto sobre o descanso nocturno esixe que entre xornadas debe existir un descanso mínimo de 12 horas e que as mulleres non poderán traballar entre as 22:00 e as 5:00 h. Exposicións mundiais en Barcelona e Sevilla. Creación das seguintes organizacións de mulleres: Asociación Nacional de Mujeres Españolas (ANME), de carácter moderado; Juventud Universitaria Feminista (JUF); Unión de Mujeres Españolas

(UME), de esquerdas; Consejo Supremo Feminista (CSF). Margarita Xirgú estrea a obra *Mariana Pineda* de Federico García Lorca.

- 1928: Formación de grupos de oposición dentro do exército. Intelectuais e estudantes crean a Fundación Universitaria Escolar (FUE) contra os poderes que na reforma dan privilexio ás universidades da Igrexa. Creación do Opus Dei. Concepción Villalobos é unha das participantes da Exposición de Arte Gallega de Madrid. Morre a actriz e empresaria teatral María Guerrero.

-1929: A aviación comercial dá os seus primeiros pasos.

-1930: Primo de Rivera presenta un plan ao rei para saír da Ditadura ordenadamente, o rei non acepta, o 28 de febreiro Primo de Rivera, presenta a súa dimisión. A Alianza Republicana está en condicións de se opor á monarquía. Hildegart Rodríguez Carballeira publica *El problema eugénico: punto de vista de una mujer moderna*.

- 1931: Segunda República. As provincias poden devir en autonomías. Tres mulleres obteñen a acta de deputadas: Clara Campoamor, Victoria Kent e Margarita Nelken. Sufraxio universal para mulleres e homes. Recoñécese o matrimonio civil e a igualdade de dereitos para fillos lexítimos e ilexítimos. Homenaxe das asociacións feministas a Clara Campoamor. Morre Teresa Claramunt, libertaria que participa na creación das primeiras entidades feministas catalás.

- 1932: Apróbase a Lei do divorcio. Morre María Gutiérrez Blanchard, pintora vencellada ás vangardas e ao cubismo.

- 1933: Concordato coa Santa Sé. Primeiras eleccións en que participan mulleres. Son elixidas cinco deputadas no Congreso: Margarita Nelken, Francisca Bohigas Gavilanes, Matilde de la Torre Gutiérrez, Veneranda García Blanco e María Lejárraga. Créanse agrupacións de mulleres antifascistas vinculadas ao PC. Morre asasinada pola súa nai a feminista e anarquista Hildegart Rodríguez Carballeira.

- 1934: Creación da Falange Femenina.

- 1934-1935: Bienio negro; socialistas e republicanos acoden divididos ás urnas, párase a reforma agraria, redúcese a influencia de sindicatos socialistas, restablecemento dalgúns poderes da Igrexa. Vaga de revoltas laborais promovidas polo anarcosindicalismo e a CNT. Folga xeral reprimida (1934). Suspensión do estatuto catalán, réxime baixo control militar. A Falange anima a militares á desobediencia. Aglutínanse os partidos republicanos. Os socialistas, divididos entre a parte que apoia o pacto con comunistas e a que prefire o pacto con republicanos.

- 1935: Por terceiro ano consecutivo, a pintora galega Eulogia de Salvador expón a súa obra na sala Gaspar de Madrid.

- 1936: Triunfo nos comicios do Frente Popular (unión de esquerdas: republicanos, socialistas, comunistas). Son elixidas cinco deputadas no Congreso: Margarita Nelken,

Victoria Kent, Dolores Ibárruri, Matilde de la Torre Gutiérrez e Julia Álvarez. Nos seis primeiros meses as mulleres poden formar parte do exército e ser mando. As Cortes españolas aproban por unanimidade a Ley de Jurados Mixtos, que permitirá a participación de mulleres. Traslado do goberno a Valencia. Franco é nomeado xefe de goberno pola Junta de Defensa. O territorio español divídese en dúas zonas militares: republicana e fascista. A través dun decreto do Goberno republicano créase a Comisión del Auxilio Femenino de Madrid. Fúndase o Secretariado Femenino do POUM. A dirixente anarquista Federica Montseny é nomeada ministra de Sanidade e Asistencia Social; ata ese momento ningunha muller ocupara ese cargo. Legalización do aborto na Generalitat de Catalunya. Créase a agrupación Mujeres Libres, relacionada coa CNT.

- 1937: No mes de maio o goberno de Juan Negrín expulsa definitivamente as mulleres da fronte. Incorporación de mulleres na industria de guerra. Creación en Bilbao do Segundo Comité de Mujeres Antifascistas. Primeira Conferencia del Secretariado Femenino do POUM. Celébrase en Madrid a Conferencia de la Unión de Muchachas. Primeira Conferencia Nacional de Mujeres Libres. En Valencia Segunda Conferencia Nacional de la Agrupación de Mujeres Antifascistas. Morre na fronte de Aragón Felicia Browe, voluntaria das Brigadas Internacionais.

- 1938: Goberno republicano: despedida das Brigadas Internacionais. Mujeres Libres solicitan sen éxito seren recoñecidas como filial oficial do movemento libertario. Goberno fascista: anulación de todas as reformas do Código civil republicano. Dítase o Fuero del Trabajo. Reimplantación do código de 1889; as mulleres casadas quedan totalmente subordinadas aos seus maridos; reintrodúcese o delito de adulterio como causa fulminante de concesión de separación se a adúltera é muller; derróganse as leis do aborto, do divorcio e de matrimonio civil con efectos retroactivos; suprímese a escolaridade mixta; prohibéselles ás mulleres o exercicio de profesións liberais.

- 1939: O estado asina o Pacto Antikomintern. Fin da guerra, con derrota republicana e vitoria franquista. Lei de responsabilidades políticas e ilegalización de partidos, sindicatos e asociacións. Un número importante de persoas son obxecto de exilios e represións. A Igrexa volve tomar o ensino nas súas mans. A correspondente de guerra nas fronte de Oviedo e Biscaia, Cecilia García Guillarte exíliase en México. Fidela Fernández, que saíra para a fronte con 16 anos, pasa a desempeñar o oficio de camioneira. «As trece rosas», trece adolescentes das Juventudes Socialistas Unificadas son fusiladas en Madrid. Morre en Madrid a pintora rexionalista asturiana Julia Alcaide y Montoya.

- 1940: Entrevista Hitler-Franco. Apróbase a Ley contra la Francmasonaría y el Comunismo, a Ley de Unidad Sindical e a Ley de Constitución de los Sindicatos, estas últimas sentan as bases do sindicalismo vertical. Julia Minguillón é galardoada na Exposición Nacional de Bellas Artes coa Medalla de Ouro pola obra *La escuela de Doloriñas*, é a primeira vez que unha muller recibe este premio.

## 1941-1960

- 1941: Entrevista Mussolini- Franco. O réxime franquista instaura a obrigatoriedade de materias domésticas na educación regulada das mulleres. Organízase a División Azul. Créase o Instituto Nacional de Industria (INI).
- 1942: Créanse as Cortes españolas, que colaboran na elaboración de leis, aínda que a potestade lexislativa é exclusiva do xefe de estado. Créase en Valencia a Unión de Mujeres Demócratas. Morre Tina Modotti, fotógrafa brigadista na Guerra Civil española.
- 1943: A pintora galega Carmen Rodríguez de Legísima realiza a súa primeira exposición na sala Macarrón de Madrid.
- 1944: Carmen Laforet é galardoada co Premio Eugenio Nadal pola súa obra *Nada*.
- 1945: A ONU condena o réxime español e nega a entrada de España na organización. Publicación dun decreto-indulto sobre responsabilidades políticas durante a guerra. Decreto de protección á familia. Condena total de prácticas abortistas con penas de prisión maior para mulleres, establecementos e profesionais que se impliquen nelas. Carmen Laforet é galardoada co Premio Nadal pola súa novela *Nada*.
- 1946: Morre María Barrientos, soprano e compositora catalá.
- 1947: Decrétase a creación dos Jurados de Empresa.
- 1948: Restablecemento de relacións diplomáticas con Arxentina. Protocolo Franco-Perón.
- 1949: Morre a mestra, escritora e xornalista María Dolores Pérez Enciso.
- 1950: A Cámara de Representantes dos EE UU vota o primeiro crédito a favor de España. A ONU acepta o restablecemento de relacións diplomáticas. Derrógase a Lei de divorcio. Obrigatoriedade de matrimonio relixioso. Creación da axencia de noticias NO-DO. A Sección Femenina da Falange encárgase da educación física de escolas primarias e institutos e promove os cursos de artesanía popular, coros e danzas. Asistencia obrigatoria de todas as traballadoras, durante dúas horas ao día e durante seis meses, a cursos promovidos pola Sección Femenina. María Moliner comeza a escribir o seu dicionario de lingua española.
- 1952: Ingreso de España na UNESCO.
- 1953: Apróbase o Regulamento de Jurados de Empresa. A Asociación Española de Mujeres Universitarias reanuda a súa actividade.
- 1954: A obra de Ana María Matute *Pequeño teatro* é galardoada co Premio Planeta.
- 1955: Morre a literata, investigadora e defensora dos dereitos das mulleres María Goyri.

- 1956: Publícase un decreto que prohibe a existencia das chamadas «casas de tolerancia» e establécense medidas para a reeducación das mulleres que traballan na prostitución.
- 1957: O Ministerio de Trabajo publica unha listaxe de ocupacións que non poderán ser desempeñadas por mulleres.
- 1958: Créase o grupo Brais Pinto en Madrid. Apróbase a Ley de Convenios Colectivos.
- 1959: Morre Antonia Rufina Maymon, mestra racionalista, anarquista e naturista.
- 1960: Promúlgase a Lei dos dereitos políticos, profesionais e laborais da muller e do neno. Créase en Madrid o Seminario de Estudios Sociolóxicos sobre la Mujer.

## 1961-1980

- 1962: Morre a pedagoga Julia Fernández Zabaleta, innovou os principios pedagóxicos e foi «depurada» durante o franquismo.
- 1964: Mujeres Libres edita *Mujeres libres en el exilio*.
- 1965: Creación do Movimiento Democrático de la Mujer (MDM). Máis adiante, en 1974, engade o sobrenome de Movimiento de Liberación de la Mujer.
- 1969: Morre Margarita Nelken Mausberger, pintora, crítica de arte, xornalista, parlamentaria socialista e comunista. Morre Margarita Xirgú, artista de teatro.
- 1971: Créase a Asociación de Mujeres Juristas. Créase na clandestinidade o Frente de Liberación Homosexual del Estado Español (FLHEE).
- 1972: As Cortes franquistas decretan a maioría de idade das mulleres aos 21 anos, deste xeito iguálase á dos homes. Morre Clara Campoamor.
- 1973: Créase a Asociación de Mujeres Separadas Legalmente. Morre no exilio María Trujillo Contreras, loitadora das Sociedades Hispánicas Confederales. Morre en Menorca a científica e teórica da educación Margarida Comas i Camps.
- 1974: Morre Aurora Bertrana Salazar, que colaborou con outras mulleres no deseño do proxecto dunha Universitat Obrera Femenina en Cataluña. Morre en México a malagueña Isabel Oyarzabal, foi periodista, dramaturga, etnóloga, escritora e formou parte do Consejo Supremo Feminista.
- 1975: Morre Franco. Juan Carlos é proclamado rei. A Lei 14/75 modifica a situación xurídica das mulleres casadas. Aumenta o número de alumnas matriculadas na universidade. Revitalización da Asociación Universitaria para el Estudio de la Problemática de la Mujer. Creación de seminarios e colectivos feministas en Madrid e Barcelona.

Creación dos primeiros centros de planificación familiar, que en principio van suplir a falta de asistencia médica da Seguridade Social e en xeral de toda a medicina dispensada ás mulleres. En decembro celébranse as Primeras Jornadas Estatales por la Liberación de la Mujer.

- 1976: Adolfo Suárez, presidente do goberno. Disolución das Cortes franquistas e aprobación da Lei de reforma política. Reorganizacións de Mujeres Libres en diferentes puntos do estado. Créase o Frente de Liberación de la Mujer, o Colectivo Mujer y Socialismo vinculado ao PSOE, a Associació Catalana de la Dona, a Unión Popular de Mujeres, o Frente de Liberación de la Mujer, a Plataforma de Organización y Grupos de Mujeres de Madrid, o Colectivo Feminista de Oviedo, a Coordinadora Provincial de Amas de Casa de Madrid, a Asociación de Mujeres Divorciadas de Barcelona, a Asociación Leonesa de Mujeres «Flora Tristán». Reúnense máis de 4000 mulleres nas I Jornadas Feministas de la Dona (Barcelona), nas que se encontran dúas correntes feministas: a radical e a de clase. No mes de decembro, a Asociación Española de Mujeres Juristas celebra o seu I Congreso Internacional. Iníciase na radio o programa feminista *Punto y aparte*. Fúndase a revista *Vindicación Feminista*. Morre Sol Ferrer, biógrafa e difusora das ideas de Ferrer y Guardia (o seu pai).

- 1977: Eleccións xerais. Saen elixidas 22 deputadas no Congreso. O goberno da UCD crea a Subdirección General de la Condición Femenina. A Asociación Universitaria para el Estudio de los Problemas de la Mujer está implantada nos distritos universitarios de Barcelona, Madrid, Navarra, Burgos, Valladolid, Santander, Málaga, Granada, Salamanca, Sevilla e Cádiz. As obreiras protagonizan numerosas protestas. Créanse: as Asociaciones Democráticas de la Mujer (ADM), vinculadas ao Partido del Trabajo de España (PT), a Organización Feminista Revolucionaria (OFR), o Grupo Independiente de Lleida para la Lucha de la Mujer, o Grupo Feminista de Cultura de Barcelona, a Asociación Segoviana para la Emancipación de la Mujer, o Colectivo Feminista de Valencia, o Movimiento de Planificación Familiar de Madrid, o Grup de Lesbianas del País Valencià, a Unión de Mujeres Republicanas de Madrid, a Agrupación Feminista de Reus, a Unión por la Liberación de la Mujer, a Asociación de Madres Solteras de Castellón, a Bizkaiko Emakumeen Biltzarra (Asamblea de Mujeres de Vizcaya), as Feministas Radicales Independientes de Sevilla, a Unión de Mujeres del Altoaragonés, o Grupo Feminista de Comercial Unión, a Asociación Catalana de Mujeres Divorciadas. Mujeres Libres retoma a súa actividade (cesara en 1939). Os días 8, 9 e 10 de decembro celébranse as Jornadas de la Mujer en Euskadi e País Valencià. Danse os primeiros pasos para a creación da Federación de Organizaciones Feministas (FOF), que se dissolve ao ano seguinte sen chegar a callar. Célebranse en Madrid as Primeras Jornadas sobre el Ama de Casa. Edítanse: *Opción*, *Nova Revista para la Mujer*, o boletín *Donas* e a revista *Mujeres Libres*.

- 1978: Promúlgase a Constitución española, establece o principio de igualdade como valor superior do ordenamento xurídico e como dereito fundamental a non discriminación por razón de sexo. Inicio do proceso autonómico. Créase a Coordinadora de Organizaciones Feministas del Estado Español (COOFFEE). Creación do grupo feminista Mujeres Enseñantes e do grupo Unión de Mujeres Republicanas Revolucionarias. Jornadas de la Condición Femenina. Creación da Librería de Mujeres de Madrid e da Librería Feminista

Dona en Valencia. A sala People de Madrid crea o Premio El Ovario de Oro. A Coordinadora de Barcelona edita o boletín *Dones en Lluita*.

- 1979: Eleccións lexislativas e provinciais. 21 deputadas no Congreso. A OFR desemboca na formación do Partido Feminista (PF). Jornadas Feministas Estatales de Granada, prodúcese a ruptura entre grupos e mulleres vencelladas ao feminismo radical e as vencelladas ao feminismo socialista. O feminismo da diferenza xeneralízase dentro da corrente independente ou autónoma. A COOFFEE elabora e edita un proxecto de divorcio.

- 1980: Primeras Jornadas de Feministas Independientes en Euskadi. Encontros de lesbianas de todo o estado en Madrid. Encontro internacional sobre o aborto en Bilbao. O Partido Feminista crea a revista teórica *Poder y Libertad*. Morre Josefina Carabias, pioneira no xornalismo escrito e radiofónico e locutora de noticias.

## 1981-1990

Publícanse coleccións dedicadas a temas relacionados co feminismo e coas mulleres nalgunhas editoriais. Créanse editoriais feministas.

- 1981: Dimisión de Adolfo Suárez e investidura de Leopoldo Calvo Sotelo. O 23 de febreiro, intento de golpe de estado a cargo do tenente coronel Tejero. O 7 xullo, Lei do divorcio. É galardoada co Premio Príncipe de Asturias de Comunicación e Humanidades a filósofa María Zambrano Alarcón. Jornadas de Feministas Independientes en Vigo no mes de xuño. En decembro encontro sobre o aborto en Madrid. Morre Amelia Torres Maeso, anarquista valenciana, enfermeira, directora do manicomio de Valencia durante a Segunda República, onde mandou queimar as camisetas de forza. Morre a actriz murciana María Martínez Vidal, fundadora da agrupación a prol da cultura Faros de Mujeres Libres.

- 1982: Eleccións xerais. Goberno do PSOE. 22 deputadas no Congreso. Constitúese o Colectivo por la Paz y el Desarme en Zaragoza. O Movemento Feminista a nivel estatal, coordinado con feministas inglesas, leva a cabo accións contra o uso de armas nucleares.

- 1983: Proxecto de lei para fomentar a igualdade da muller. Creación do Instituto de la Mujer, adscrito ao Ministerio de Cultura. O Colectivo por la Paz y el Desarme de Zaragoza organiza o Primer Encuentro de Organizacións Pacifistas do Estado español e unha cadea humana que congrega a 25 000 persoas. Por iniciativa dun grupo de mulleres vinculadas a partidos políticos de esquerda celébranse as Jornadas sobre la Corriente de Feminismo Socialista os días 29 e 30 de xaneiro en Madrid. Xornadas de sexualidade organizadas por colectivos feministas en Madrid no mes de xuño. Jornadas de Feministas Independientes en Valencia.

- 1984: O día 21 de marzo de 1984 publícase no BOE o Instrumento de Ratificación do 18 de decembro de 1983 da Convención sobre a eliminación de todas as formas de discriminación contra a muller feita en Nova York o 18 de decembro de 1979. O Ministerio do Interior comeza a publicar cifras relativas a denuncias por malos tratos nas comisarías da policía. A Comisión de DDHH do Senado crea a Ponencia de Investigación de Malos

Tratos a Mujeres e publica o *Informe de la Comisión de Relaciones con el Defensor del Pueblo*, esta última encargada do estudo da muller maltratada. Créase a 1ª casa de acollida para mulleres maltratadas en Pamplona. Jornadas Feministas en Euskadi.

- 1985: Regúlase a Lei do aborto, limitado a determinados supostos; desde entón, colectivos feministas reclaman a súa ampliación. Celia Amorós publica *Crítica de la razón patriarcal*. Publícase *Mujer vasca. Imagen y realidad*, que recolle contribucións dun grupo de traballo dirixido por Teresa del Valle, que dedica unha parte importante do seu esforzo a rebater o mito do matriarcado vasco e o hipotético poder das mulleres.

- 1986: Eleccións xerais. 33 deputadas no Congreso. Promúlgase a Ley de la Ciencia, encamiñase á potenciación da actividade científica. Referendo sobre a permanencia ou non do Estado español na OTAN. Créase a revista en *Pie de Paz*.

- 1987: A bioquímica María Cascales ingresa na Real Academia de Farmacia como membro de número, é a primeira vez que unha muller ocupa este cargo.

- 1988: Lei 35/1988, do 22 de novembro, sobre técnicas de reprodución asistida humana. Galardoada co Príncipe de Asturias das Letras a narradora Carmen Martín Gaité. A Real Academia de Ciencias Exactas, Físicas y Naturales por primeira vez admite unha muller como membro, trátase de Margarita Salas. Nove mulleres entran na Academia General Básica de Suboficiales do exército español. Licénciase a primeira promoción da Garda Civil que conta con mulleres nas súas filas. Celébranse en Compostela as Xornadas feministas «Violencia machista» da Coordinadora de Organizacións Feministas do Estado Español (COOFFEE). Lourdes Méndez publica *Cousas de mulleres. Campesinas, poder y vida cotidiana (Lugo 1940-1980)*, que pon en entredito o patriarcado con igualdade de dereitos e os traballos antropolóxicos androcentricamente nesgados e que desembocan en xeneralizacións a-históricas e esencialistas sobre a Galicia rural e a cultura galega.

- 1989: Eleccións xerais. 54 deputadas no Congreso. Reunión de mulleres no mosteiro de Veruela, convocadas pola revista *En Pie de Paz*, que tratan cuestións relacionadas coa entrada de mulleres no exército.

- 1990: Morre Lola Iturbe, pertencente a Mujeres Libres, implicada na loita sindical e na guerra do 1936-1939.

## 1991-1995

- 1991: Fúndase a Asociación Española de Investigación de Historia de las Mujeres (AEIHM). Outórgase o Premio Príncipe de Asturias das Artes á xeración lírica española, representada por Victoria de los Ángeles, Teresa Berganza, Montserrat Caballé, José Carreras, Plácido Domingo, Alfredo Kraus e Pilar Lorengar. Morre María Zambrano, filósofa, exiliada, profesora na Universidade da Habana, premio Cervantes.

- 1992: O Tribunal Constitucional resolve contra HUNOSA por discriminación sexual. Morre Casilda Hernández Vargas, *Casilda la Miliciana*, militante de Mujeres Libres e de orixe cigana.

- 1993: Eleccións xerais. 65 deputadas no Congreso. Créase o Instituto Universitario de Estudios sobre la Mujer en Madrid. Créase un grupo de Mulleres de Negro de Zaragoza. Jornadas Feministas Estatales en Madrid. Sae á rúa o número 0 da revista *Amaranta*, editada pola Asamblea Feminista de Madrid.

-1994: Créase o partido Mujeres para el Futuro de Europa, co fin de defender a existencia de democracia paritaria no Parlamento europeo. Galardoada co Príncipe de Asturias das Artes a pianista Alicia de Larrocha e co dos deportes Martina Navratilova. Concentracións de mulleres vestidas de negro en diferentes puntos do territorio. María-Milagros Rivera Garretas publica *Nombrar el mundo en femenino. Pensamiento de las mujeres y teoría feminista*.

-1995: Lei 35/1995, do 11 de decembro, de axudas e asistencia ás vítimas de delitos violentos e contra a liberdade sexual. O Ministerio de Educación y Ciencia diferencia o uso do masculino e feminino nos títulos oficiais. Galardoada co Príncipe de Asturias dos Deportes Hassiba Boulmer. Morre a pintora Maruja Mallo en Madrid. Morre a actriz e directora Ana Mariscal. Morre a escritora santanderina Concha Espina, chegara a ser candidata ao Premio Nobel.

## 1996-2000

- 1996: Eleccións xerais. Goberno do PP. 98 deputadas no Congreso. Real decreto 91/1996, do 26 de xaneiro, de medios adscritos aos servizos da Administración do Estado traspasados á Comunidade Autónoma de Galicia polo Real decreto 2834/1983, do 5 de outubro, en materia de protección da muller e a súa asignación á Consellaría de Familia, Muller e Xuventude. Morre Carmen Conde, escritora e poetisa nomeada en 1978 membro da RAE. Morre Carmen Martín Belinchón, enlace guerrilleira na guerra do 1936-1939.

- 1997: Real decreto 738/1997, do 23 de maio, polo que se aproba o Regulamento de axudas ás vítimas de delitos violentos e contra a liberdade sexual. Real decreto 774/1997, do 30 de maio, polo que se establece a nova regulación do Instituto da Muller. O Consello de Ministros aproba o «III Plan para la igualdad de oportunidades entre mujeres y hombres» e celebra unha Conferencia Sectorial Extraordinaria sobre la Violencia, na que se acorda elaborar un «Plan de acción sobre a violencia contra as mulleres». Morre a cineasta Pilar Miró.

- 1998: O Consello de Ministros aproba o «Plan de Acción contra la violencia doméstica (1998-2000)». Informe do Defensor do Pobo sobre «Violencia contra las Mujeres». Circular da Fiscalía Xeral do Estado sobre a intervención do Ministerio Fiscal na persecución de malos tratos. Sete mulleres de todos os continentes reciben o Premio Príncipe de Asturias da Concordia: Fátima Boudiaf, Olainka Koso-Thomas, Graça Machel,

Fatana Ishaq, Somaly Mam, Rigoberta Menchú e Enma Bonnino; o dos Deportes, Arantxa Sánchez-Vicario. Morre a escritora e poetisa feminista catalá María Mercé Marçal.

- 1999: Lei orgánica 14/1999, do 9 de xuño, de modificación do Código penal de 1995, en materia de protección ás vítimas de malos tratos e da Lei de axuízamento criminal. Lei 39/1999, do 5 de novembro, para promover a conciliación da vida familiar e laboral dos e das traballadoras. Decreto 312/1999, do 11 de novembro, polo que se refunde a normativa vixente en materia de muller. I Congreso Estatal «La violencia impide la igualdad» no mes de maio. Galardoada co Príncipe de Asturias dos Deportes Steffi Graf.

- 2000: Eleccións xerais. 132 deputadas no Congreso. Real decreto 1368/2000, do 19 de xullo, de desenvolvemento das prestacións económicas de pago único por nacemento de terceiro ou sucesivos fillos/as e por parto múltiple. Real decreto 1686/2000, do 6 de outubro, polo se crea o Observatorio de la Igualdad de Oportunidades entre Mujeres y Hombres. Modifícanse determinados artigos do Regulamento do Rexistro Civil en materia relativa ao nome e apelidos e a súa orde. Galardoada co Príncipe de Asturias das Artes a cantante Barbara Hendricks. A ciclista de montaña Margalida Fullana Riera obtén o primeiro posto nos Xogos Olímpicos de Sydney. Jornadas Feministas Estatales en Córdoba. Morre Felicita Díaz, membro da CNT, que, entre outras cousas, foi encargada do centro de refuxiados de Terrassa en 1936 e en 1938 foi vicesecretaria do Comité Regional de Mujeres Libres. Morre a escritora salmantina Carmen Martín Gaité. Morre Vicenta Berenguer, loitadora pola independencia feminina, a liberdade dos presos sociais e a ecoloxía.

## Século XXI

### 2001-2005

- 2001: Real decreto 1251/2001, do 16 de novembro, polo que se regulan as prestacións económicas do sistema da Seguridade Social por maternidade e risco durante o embarazo. É galardoada co Príncipe de Asturias das Letras Doris Lessing. A revista *En Pie de Paz* pecha as súas portas. Morre Sonia del Río, historiadora libertaria do Ateneo Enciclopédico Popular de Barcelona.

- 2002: Modificación do Código civil en materia de nacionalidade. A sección española de Amnistía Internacional lanza unha campaña de sensibilización a favor da moza nixeriana Safiya Hussaini, condenada a morrer lapidada por adulterio. Un grupo de científicas crea a Asociación de Mujeres Investigadoras y Tecnólogas (AMIT).

- 2003: Real decreto lei 2/2003, do 25 de abril, de medidas de reforma económica, en relación coas mulleres traballadoras. Lei orgánica 11/2003, do 29 de setembro, de medidas concretas en materia de seguridade cidadá, violencia doméstica e integración social dos estranxeiros. Lei 27/2003, do 31 de xullo, reguladora da Orde de protección das vítimas da violencia doméstica. Lei 30/2003, do 13 de outubro, sobre medidas para incorporar a valoración do impacto de xénero nas disposicións normativas que elabore o Goberno. O 24 de maio, «Día das Mulleres pola Paz», grupos de mulleres de todo o mundo maniféstanse

contra a invasión de Irak. Foron galardoadas co Príncipe de Asturias das Letras Fátima Mernissi e Susan Sontag; co de Investigación Científica e Técnica, Jane Goodall; co da Concordia, Joanne Kathleen Rowling.

- 2004: Eleccións xerais. Goberno do PSOE. 127 deputadas no Congreso. Lei orgánica 1/2004, do 28 de decembro, de medidas de protección integral contra a violencia de xénero. María Teresa Fernández de la Vega é nomeada vicepresidenta do Goberno.

- 2005: Reforma da Lei do divorcio. Lei de matrimonio civil sen discriminación por razón de opción sexual. O Instituto Cervantes asina un convenio coa Real Academia Galega (RAG) para promover a presenza da lingua e da cultura de Galicia en todos os centros do Instituto. O Premio Príncipe de Asturias das Artes recae en Maya Plisetskaya e Tamara Rojo; o das Letras en Nélica Piñón; o de Cooperación Internacional en Simone Veil.

## 2006-...

-2006: É declarado Ano da Memoria. O 3 de marzo o Consello de Ministros dá o visto e praxe ao Anteproxecto de Lei Orgánica de Igualdade entre Mulleres y Homes. María Teresa Miras Portugal é elixida presidenta de Real Academia de Farmacia. No mes de outubro a filósofa Celia Amorós é galardoada co Premio Nacional de Ensaio. O Premio Príncipe de Asturias de Ciencias Sociais recae en Mary Robinson. Morre María José Urruzola, feminista e autora de guías pedagóxicas non sexistas.

- 2007: É declarado Ano da Ciencia. O venres 23 de marzo de 2007 o BOE publica a Lei orgánica 3/2007 para a igualdade efectiva de mulleres e homes que ten a finalidade de acadar a igualdade real e efectiva entre mulleres e homes e a eliminación de toda discriminación por razón de sexo, en particular a que afecta ás mulleres. Tamén en marzo o Congreso dos Deputados aproba a Lei de identidade de xénero; as e os transexuais poderán cambiar o seu nome e sexo no Rexistro Civil e no DNI sen necesidade de operacións de cambio de sexo. Obras de artistas feministas dan corpo á exposición *Kiss kiss Bang Bang* no Museo de Bellas Artes de Bilbao.

- 2008: Eleccións xerais; Goberno do PSOE.; 126 deputadas no Congreso, paridade no Consello de Ministros. Creación do Ministerio de Igualdad. Ingrid Betancourt é galardoada co Premio Príncipe de Asturias da Concordia e Margaret Atwood co das Letras. Ana Romaní é galardoada co Premio Atlántida á mellor xornalista de radio. Galardoada co Premio Comadre de Oro a Asociación de Clínicas Acreditadas para la Interrupción Voluntaria del Embarazo. Baixo o lema «La igualdad no es una utopía», celébrase en Madrid a X edición do Encontro Internacional Mundos de Mujeres 2008. Despois de 14 anos, celébranse as IV Jornadas Feministas de Euskal Herria. Celébranse as II Jornadas Feministas NI Putas NI Sumisas. Pasamento de: Rosario Sánchez Mora, miliciana coñecida como «La Dinamitera»; Luisa Isabel Álvarez de Toledo y Maura «Duquesa de Medina Sidonia», tamén coñecida como «Duquesa Roja»; Mercè Sala, política e economista; Piedad de la Cierva Viudes, científica; Matilde Ucelay Maórtua, a primeira arquitecta española.

**MUNDO**

# MEDIEVO

- A vida conventual é escollida como lugar-refuxio por mulleres sobre todo pertencentes á nobreza e á burguesía e que non dispoñen de dote para casar axeitadamente. A cantidade de dote requirida para a entrada no convento é menor que a necesaria para casar.

- Nos conventos e abadías xeracións de mulleres exercen a tarefa de copiar e elaborar miniaturas ilustrando códices e libros de salmos.

- Mulleres con oficios, entre outros moitos: carniceiras, ferraxeiras, fabricantes de redes, zapateiras, fabricantes de luvas, faixeiras, camiseiras, fabricantes de carteiras, sombreireiras, comadroas, esfoladoras, encadernadoras, pintoras, fiadeiras de seda, bordadoras, salgadeiras, campesiñas, lavadeiras, creadoras de ourives. Tamén algunhas mulleres son ás veces mestres gremiais.

- A anulación matrimonial e a posibilidade de ter novas nupcias están reservadas para casos de incapacidade de reprodución.

- Nos séculos V-XI a Lex Gotica permite que as mulleres dispoñan de propiedade. A maioría dos matrimonios son civís, comezan a realizarse tamén matrimonios eclesiásticos.

- No século VI santa Radegunda exerce os poderes propios dunha raíña no ámbito xudicial e administrativo, contrariando ao seu marido.

- No século VII existen mosteiros con seccións separadas para monxes e monxas unidas polo goberno dunha abadesa.

- Ata o século IX é común entre reis e nobres a práctica da polixinia.

- Século X: A monxa castelá Ende realiza unha serie de miniaturas para ilustrar un códice sobre a fin do mundo, as súas son cualificadas como obra mestra.

- Século IX: Dhuoda, nacida nunha familia da alta nobreza, aprende a vivir soa, a gobernar os campos, a pedir préstamos a cristiáns e xudeus para armar o seu marido e escribe un manual de educación. A igrexa comeza a elaborar as súas estratexias futuras para se inmiscir nas prácticas sexuais e matrimoniais da poboación.

- Século XI: Coa Reforma Gregoriana (1075) aumentan os referentes e referencias ás mulleres e ao corpo sexuado femia como símbolo de maldade. Trótula é unha médica da Escola de Salerno, centro médico non conectado coa igrexa e no que as mulleres poden aprender, exercer e ensinar medicina; a obra de Trótula máis coñecida é *De passionibus mulierum ante in et post partum*. Murasaki Shikibu escribe a obra *Genji monogatari*; trátase dunha novela de cincuenta capítulos e miles de páxinas.

- Século XII: A burguesía comeza a se configurar como unha clase distinta e diferenciada dos señores. O traballo comeza a ser definido como unha actividade pola que a cambio se recibe unha paga. Fórmanse e desenvólvense numerosas institucións educativas, unhas están ligadas á Igrexa, outras teñen un carácter máis independente. O alto clero goza de recoñecemento máxico-mítico baseándose na escritura e no ensino. A Igrexa ten as súas propias normas e conta con tribunais especiais. Coa imposición do matrimonio monogámico e indisoluble a Igrexa trata de moralizar os propios costumes eclesiásticos, transformar a nobreza e someter o resto do pobo de Deus ao imperialismo eclesiástico. Aumento da participación das mulleres na vida social, espiritual e intelectual medieval como oíntes, lectoras, mecenas, transmisoras de grandes herdanzas e titoras. A cosmóloga e médica Hildegarda de Bingen escribe e ilustra importantes textos de ciencias naturais, bioloxía, botánica, astronomía e medicina. A científica e médica Herrad Landsberg escribe *Hortus deliciarum*, enciclopedia de relixión, historia, astronomía, xeografía, historia natural e botánica médica. Existen mulleres que realizan o oficio de miniaturistas fóra da vida conventual. A miniaturista Claricia autoreprésentase nun libro de salmos.

- Século XIII: A formación das universidades supón o ordenamento, agrupación e xerarquización de oficios e unha redución das posibilidades educativas das mulleres. A finais deste século, Guillermine de Bohemia crea unha igrexa de mulleres á que acoden tanto mulleres do pobo como burguesas e aristócratas; foron denunciadas pola Inquisición a comezos de século XIV. Bocaccio escribe *De claris mulieribus* (1360), libro en que se recollen 104 biografías de mulleres.

- XIII-XIV: Na Universidade de Boloña, unha das poucas que admiten mulleres, a anatomista Alessandria Giliani (1275-1326) ideou a técnica de inxectar líquidos nos vasos sanguíneos.

-Século XIV: Institúense formas de control social tanto inquisitoriais como de policía urbana. Fanse máis estritas as leis que someten as mulleres á autoridade do marido. Xorde a figura do vagabundo pobre ligada á desconversión da sociedade feudal. Tense constancia de que nas universidades estudaban e ensinaban mulleres; cando menos nas de Salamanca e Boloña. En 1310 a mística e escritora francesa Margarita Poret é queimada viva. En 1322 a bula do papa Xoán XXII condena tanto a Ars Nova como as tendencias modernistas na música.

- Século XV: A igrexa condena á fogueira a Xoana de Arco (1431). Aparición da obra de Cristine de Pizan *Le livre de la cité des dames* (1405); esta autora, ao quedar viúva, traballa de copista e ilustradora para manter a súa familia. As obras da pintora Susana Horenbout chegan a ter unha gran sona.

- 1492: Seguindo a estrutura do *Decameron*, Margarita de Navarra escribe un volume de 200 contos e historias titulado *Heptameron*.

- A finais da Idade Media institucionalízase a prostitución, as prostitutas constitúen daquela un dos primeiros colectivos asalariados que non contan con irmandades e que se someten a normas profesionais impostas polos donos dos prostíbulos; isto é, as autoridades reais, relixiosas e municipais.

## Século XVI

- Actividade inquisitorial contra mulleres: queima de bruxas. Estas condenas prólonganse ata o s. XVIII.
- Aparición do beguinato como busca de educación por parte dalgunhas mulleres excluídas das universidades.
- 1542: A gobernadora de Tetuán, Sayyida al-Hurra, é destituída.
- 1555: Joana de Gama escribe sobre as limitacións sufridas polas mulleres desde que o mundo é mundo. Sofonisba Anguissola pinta *Juego de ajedrez*, obra considerada como unha das mellores do seu xénero neste século.
- 1556: Nace en Dinamarca Sofie Brahe, quen chegará a ser unha importante astrónoma e a traballar co seu irmán Tycho; as súas observacións serán cruciais para que Kepler poida determinar as órbitas elípticas dos planetas. Nace en Venecia Marietta Robusti, *La Tintoretto*, quen chegará a ser unha pintora de grande éxito.
- 1563: O Concilio de Trento decreta que as mulleres teñen alma.
- 1565: Nace Marie Le Jars de Gournay, que chegará a ser literata, filósofa e alquimista.
- 1575: A gravadora Diana Scultori Ghisi, coñecida como Diana Mantovana, obtén o permiso papal para firmar, imprimir e vender os seus traballos, sendo a primeira muller en obter este dereito.
- 1576: Pasamento de Levina Teerline, recoñecida miniaturista inglesa e a mellor pagada das e dos miniaturistas da súa época.
- 1581: Francesca Caccini compón a ópera *La liberazione de Ruggiero*, é a primeira vez que unha muller realiza unha tarefa destas características.
- 1593: Nace en Roma Artemisa Gentileschi, que chegará a ser unha das poucas pintoras que puido traballar e vivir como artista naquela época.

## Século XVII

- En Francia comezan a súa andadura os Salóns como espazo público, neles as mulleres teñen unha presenza notoria e protagonizan o movemento literario e social coñecido como preciosismo. Cavendish (1623-1673) defende a capacidade das mulleres para elaborar coñecemento científico, creativo e orixinal. No campo da astronomía adóptase o sistema copernicano.

- 1622: Marie Le Jars de Gournay publica *De l'égalité des hommes et des femmes*.
- 1626: Nace Mary Boyle, que chegará a ser unha gran coñecedora da aplicación das plantas no ámbito da medicina.
- 1640: Martine de Beausoleil, considerada como a primeira xeóloga do mundo, insta ao rei de Francia para que faga uso dos ricos xacementos minerais do país.
- 1647: Nace Maria Sybilla Merian, que chegará a ser unha das entomólogas máis citadas ao longo do século XVIII.
- 1648: Nace en Mexico Juana Inés de la Cruz, quen chegará a ser unha destacada monxa, poeta, escritora, polemista, ensaísta e precursora da educación das mulleres.
- A mediados de século créanse varias seitas, algunhas delas inclúen as mulleres como predicadoras e admiten que o espírito pódese expresar a través delas.
- 1653: Morre a poetisa, filósofa e humanista italiana Lucrecia Marinelli.
- 1658: A pintora Elisabetta Sirani abre unha escola de pintura para mulleres en Boloña.
- 1660: Fúndase a institución científica Royal Society de Londres, non admite mulleres como membros.
- 1666: Fundase a Académie des Sciences en Francia, non admite mulleres como membros.
- 1673: A obra do cartesiano Poulain de la Barre *De l'égalité des deux sexes* adóptase como punto de arranque da polémica moderna sobre a igualdade dos sexos.
- 1688: Aphra Behn, escritora e precursora do feminismo en Inglaterra, escribe a obra *Oroonoko: or, the Royal Slave. A True History*, na que subverte as ideas do seu tempo sobre os pobos «non civilizados», obra considerada por moitas persoas como a primeira novela filosófica en lingua inglesa.
- Lady Mary Montagu (1689-1762) introduce en Europa a inmunización contra a varíola.
- 1692: Comeza o xuízo das bruxas de Salem.

## Século XVIII

- A prensa comeza a perfilarse como unha forma de expresión e formación da opinión pública. Montagu (1689-1762), Châtelet (1706-1749), Bassi (1711-1778) e Agnesi (1718-1799) defenden a capacidade das mulleres para elaborar coñecemento científico, creativo e

orixinal e seguen a ser moitas as mulleres que cos seus traballos en eidos como as matemáticas, a física, a química, a filosofía, a política ou a medicina seguen a demostrar que iso é real.

- 1700: Créase a Societas Regia Scientiarum (posteriormente chamada Akademie der Wissenschaften) en Berlín.

- 1702: A astrónoma María Winkelman descubre un cometa.

- 1703: Morre a filósofa francesa Gabrielle Suchon, autora do *Traité de la morale et de la politique*, publicado en 1693.

- 1706: Nace Emilie du Chatelet, chegará a ser unha importante matemática, traducirá os *Principia* de Newton e divulgará os conceptos de cálculo diferencial e integral nos seus escritos.

- 1711: Nace Laura Bassi, tradutora e estudosa da física de Newton e responsable da súa implantación en Italia.

- 1715: Considerado como o primeiro grito revolucionario feminista da literatura portuguesa, édítase o libro de cordel de Paula da Graça *Bondade das mulheres vendicada e malícia dos homens manifesta*.

- 1718: Nace María Gaetana Agnesi, que como matemática realizará importantes estudos sobre tanxentes e curvas.

- 1720: A pintora italiana Rosalba Carriera lanza a moda da pintura ao pastel durante a súa estancia en París.

- 1721: Montesquieu publica *Lettres persanes*.

- 1723: Nace Nicole Reine, quen chegará a realizar medicións astronómicas relacionadas coa volta do planeta Halley e da eclipse solar do ano 1764.

- 1724: A dinastía borbónica funda na Cidade de México o primeiro convento para indíxenas de monxas cacicas de Corpus Christi.

- 1726: Nace Anna Blackburne, chegará a ser unha das fundadoras do museo de Oxford Hall.

- 1729: Morre a compositora francesa Elisabeth C.

- 1732: Laura Bassi obtén o seu doutoramento en Filosofía na universidade de Boloña.

- 1742: Dorothea Christine Leporin defende o dereito das mulleres a cursar estudos universitarios.

- 1744: Nace Sara Banks, chegará a ser unha importante naturalista inglesa.
- 1745: A pintora de orixe española Françoise Duparc chega a Francia e perfecciona a súa técnica.
- 1748: Nace en Francia Jacques Louis David, quen chegará a ser pintor de cámara de Napoleón e un dos poucos artistas que se ocupou de facer escola con mulleres e de formar artistas.
- 1750: Nace Caroline Herschel, que chegará a ser unha importante astrónoma; constrúe grandes telescopios xunto co seu irmán, descubre oito cometas, mil estrelas dobres e outros fenómenos.
- 1756: No volume 6 de *L'Encyclopédie*, Jaucourt argumenta que é posible que a subordinación das mulleres no matrimonio sexa unha construción social. Nace en Hannover Caroline Herschel, quen realizará importantes traballos relacionados coa astronomía.
- 1758: Nace Marie-Anne Paulze (Mme. Lavoiser), quen chegará a ser, xunto co seu home, unha das principais promotoras da química como ciencia experimental; publica *Memorias de química* baixo o nome do seu marido.
- 1761- 1762: Rousseau publica *Julie*, *Émile* e *Du contrat social*, que establece teses misóxinas como a superioridade dos homes sobre as mulleres e que a función social destas últimas debe ser satisfacer os homes e atender as crianzas.
- 1762: Madame de Beaumer funda *Le Journal des Dames*.
- 1764: Morre en Versalles a marquesa de Pompadour, mecenas da arte.
- 1774: En Francia prohíbese ás mulleres a participación en calquera tipo de actividade política.
- 1776: Trece colonias americanas decláranse independentes. Nace Shopie Germain, quen chegará a ser coñecida pola súa teoría das superficies elásticas.
- 1787: Na obra *Lettres d'un bourgeois de New Haven à citoyen de Virginie*, Condorcet defende o dereito das mulleres a votar. Publícase a obra de Madame de Coicy *Mémoire pour le sexe féminin contre le sexe masculin*. A astrónoma Caroline Herschel, entre cuxos traballos destaca o ordenamento do British Catalogue de Flamsteed, é nomeada axudante de astrónomo da corte de Inglaterra.
- Agroma o feminismo como movemento social e político vencellado á Ilustración e á Revolución Francesa; o 1 de xaneiro de 1789, mulleres de diferente condición social dan a coñecer a *Petición de Mulleres do Terceiro Estado* con reivindicacións como o dereito ao voto, o dereito á instrución, igualdade de dereitos no matrimonio, medidas contra a dobre moral, libre acceso a todos os oficios, garantías de igualdade laboral e participación das mulleres nas transformacións sociais.

- 1789: As mulleres ocupan un lugar fundamental no decurso da Revolución Francesa (1789-1795), protagonizan a toma da Bastilla o 20 de xuño lideradas por Théroigne de Mericourt e marchan a Versalles en outubro lideradas por Louison Chabry e Renée Audon; malia isto, a Declaración dos Dereitos do Home e do Cidadán exclúeas da cidadanía.
- 1790: Publícase a obra de Condorcet *Sur l'admission des femmes au droit de cité*. A Asemblea Nacional francesa proclama a igualdade ante a lei excluindo ás mulleres.
- 1791: Promúlgase a primeira Constitución francesa, que exclúe as mulleres da cidadanía. Abólense os dereitos feudais en Francia. Publícase a obra de Olimpe de Gouges *Déclaration des droits de la femme et la citoyenne*, que reclama a igualdade xurídica e política das mulleres.
- 1792: Publícase a obra de Mary Wolstonecraft *Vindication of the Rights of Woman*, que reclama a igualdade xurídica e política das mulleres e rexeita as teses misóxinas de Rousseau.
- 1793: Péchanse clubs de mulleres en Francia e Pauline Léon e Claire Lacombe fundan o Club de Cidadás Republicanas Revolucionarias vinculado ao movemento dos Enragés, situado na esquerda política. Morren guillotinas Olimpe de Gouges e Mme. Roland.
- 1793-1794: Petición de dereitos das mulleres nas novas repúblicas do territorio italiano. En Holanda fálese dos dereitos das mulleres. Nas escolas alemás débátese sobre a diferenza entre os sexos. Os políticos ingleses ridiculizan as demandas dos dereitos políticos das mulleres.
- 1795: As mulleres volven tomar as rúas de París reclamando a restitución da Constitución Montañesa de 1793, que recolle o dereito á instrución e ao sufraxio universal; non obstante, calquera movemento político de carácter revolucionario é reprimido e a lexislación establece que o único suxeito político é o propietario.
- 1796: Nace Cecilia Böhl de Faber, quen como escritora empregará un pseudónimo masculino para publicar.
- 1799: Nace Mary Anning en Inglaterra, chegará a ser unha das máis importantes xeólogas da súa época.

## Século XIX

- A prensa consolídase como forma principal de expresión e formación da opinión pública. Ao longo deste século van tomar forma as teorías evolucionistas e bioloxicistas na explicación dos sexos e das relacións sociais. Tamén é este o século dos grandes movementos sociais emancipatorios, que contan coa participación de mulleres. O feminismo de carácter internacional emana dun grupo social que se constitúe como tal e

intenta definir a un tempo a identidade e o lugar das mulleres nun todo social. As mulleres móvense, viaxan e migran atraídas polo mercado laboral das cidades; as campesiñas traballan sobre todo como empregadas domésticas e costureiras, as burguesas como institutrices. Na práctica existen lugares (políticos, militares, xudiciais, intelectuais, deportivos...) vedados para as mulleres e outros que se lles adxudican case con exclusividade como: lavadoiros, tendas, salóns de té... Segundo avanza o século a esixencia do matrimonio por amor tórnase máis insistente.

## 1800-1850

- Desenvolvemento do feminismo liberal e do feminismo de clase: socialista, comunista e anarquista.
- Gran debate sobre a capacidade biolóxica das mulleres para o estudo (Frances Gall).
- 1803: Pasamento de Adélaide Labille-Guiard, pintora francesa dedicada a temas de historia e retratos.
- 1804: Código napoleónico, que vai influír na consideración das mulleres como suxeito menor e incapaz e como propiedade do marido.
- 1806: Morre Charlotte Smith, poetisa e novelista inglesa que denunciara a sociedade patriarcal.
- 1807: Germaine de Staël publica *Corinne*.
- 1808: Charles Fourier publica *Théorie des quatre mouvements*.
- 1813: A Asemblea Xeral declara libres as fillas e fillos das e dos escravos do Río da Prata.
- 1815: Congreso de Viena. Abolición do tráfico de escravos. Restauración das monarquías absolutas.
- 1816: Juana Azurduy de Padilla lidera a derrota das tropas españolas en Bolivia.
- 1818: Nace Emily Brönte, célebre literata inglesa. Nace María Mitchell, chegará a ser unha importante astrónoma.
- Anos vinte: en Europa prodúcense severas restricións na liberdade de prensa e de asociación. Desenvólvese a revolución grega. Publícanse diversos tratados sobre a educación das mulleres. Nos Estados Unidos de América do Norte organízase o movemento abolicionista feminino formando parte da loita pola abolición da escravitude, neste contexto moitas mulleres toman consciencia da súa propia condición de mulleres explotadas.

- 1820-1840: En Gran Bretaña o movemento obreiro expulsa progresivamente as mulleres das *inns* (tabernas) e pubs que antes frecuentaban. Nas localidades da Provenza as mulleres retíranse das *chambretes*. Nace Florence Nightingale, chegará a facer importantes contribucións para a mellora das condicións sanitarias.

- 1821: Morre Napoleón. O código napoleónico vai ter unha grande influencia nos códigos civís e lexislacións respecto da muller en todo o mundo.

- 1822: Primeira Constitución portuguesa.

- 1830: Coroación do rei Luís Filipe en Francia por temor á revolución. Revolución polonesa. Independencia de Bélxica. O 15 de setembro inaugúrase a primeira liña de ferrocarril con automoción de vapor Liverpool-Manchester. Exploración da Antártida. Emerxencia do positivismo científico e das súas teorizacións. O feminismo emana dun grupo social que se constitúe como tal e intenta definir a un tempo a identidade e o lugar das mulleres nun todo social.

- 1831: Nace Amelia Barr, novelista e escritora; entre os seus traballos destaca a historia de Inglaterra, Escocia e América.

- 1832: As reformas británicas exclúen explicitamente o sufraxio das mulleres. Marie Smith, muller solteira de Yorkshire, fai un escrito pedindo o voto das mulleres non casadas. Suzanne Voilquin publica *La femme libre*.

- 1833: Ao fío do movemento antiescravista nos EE UU, as mulleres establecen novas formas organizativas. Eugénie Niboyet funda o Conseiller des Femmes (Consello das Mulleres) en Lyon. Flora Tristán publica o libro en que recolle as súas experiencias de viaxes por Perú.

- 1836: Flora Tristán escribe o seu primeiro panfleto feminista, *Nécessité de faire bon accueil aux femmes étrangères*.

- 1837: Código morse. Campañas de reforma da situación da muller no xudaísmo. Sarah Grimké escribe *Letters on the Equality of the sexes. Addressed to Mary S. Parker, President of the Boston Female Anti-Slavery Society*, nelas establece unha unidade dialéctica imprescindible entre a loita pola abolición da escravitude e a feminista.

-1839: Guerra do opio entre China e Inglaterra.

- 1840: Celébrase en Londres a Convención Mundial contra a Escravitude, nela négaselles a Lucrecia Mott e Elizabeth Candy Stanton o seu dereito a falar.

- 1842: Nace Agnes Mary Clarke, astrónoma e escritora inglesa que formou parte da Real Sociedade Astronómica. Pasamento de Elisabeth Louise Vigée-Lebrun, a pintora francesa con máis sona neste século.

- 1843: Publícase a obra de Flora Tristán *L'union ouvrière*. Publícase a obra de Marion Reid *A Plea for Women*. Leis de Mendel sobre a herdanza biolóxica.
- 1844: Nace nos Estados Unidos de Norteamérica Mary Cassat, que chegará a ser unha relevante pintora impresionista. Morre Flora Tristán.
- 1845: Aurore Dupin, co pseudónimo de «George Sand », publica *Histoire de ma vie*.
- 1847: Charlotte Brontë publica a obra autobiográfica *Jean Eire*. Morre a compositora e pianista Fanny Hensel Mendelssohn.
- 1848: Revolucións en París, Berlín, Viena, etc. Abolición da escravitude nas colonias francesas. Publicación do *Manifest der Kommunistischen Partei*. «Declaration of Sentiments» en Séneca Falls, que dá lugar ao denominado feminismo sufraxista; este cobra forza desde mediados de século en EE UU e Inglaterra. Primeira Convención sobre os Dereitos da Muller en Nova York. Auguste Comte publica *Système de politique positive*. Morre Caroline Herschel, astrónoma alemá e primeira muller en descubrir un cometa. Pasamento da pintora americana Mary Stevenson Cassatt.
- 1849: Louise Otto-Peters potencia a creación do *FrauenZeitung*, o xornal seguirase editando ata 1952. Nace Mercedes Cabello de Carbonera, que chegará a ser considerada iniciadora da novela moderna en Perú.
- 1850: Celébrase en Frankfurt o Congreso Universal dos Amigos da Paz. A danesa Mathilde Fibiger publica unha recompilación de 19 cartas sobre a emancipación das mulleres. Nace Sofía Kovalevskaja, que chegará a ocupar un importante lugar como matemática rusa. Morre Margarita Teller, muller de grande influencia na filosofía norteamericana.

## 1851-1900

- 1851: Nace en Berlín Carolina Michaëlis de Vasconcelos. Celébrase en Akron (Ohio) a Primeira Convención Nacional polos Dereitos da Muller, na que a activista negra Sojourner Truth toma a palabra e pregunta: acaso eu non son unha muller? Morre a escritora Mary Shelley, autora de *Frankenstein*.
- 1852: Harriet Beecher-Stowe publica *Uncle Tom's Cabin*, obra convertida en manifesto antiescravista dunha época. Jeanne Deroin publica o *Almanach des Femmes*, con artigos en francés e inglés. Morre Ada Byron, quen destaca por escribir o primeiro programa matemático para unha computadora.
- 1856: Nace en Freiberg Sigmund Freud.
- 1857: As mulleres danesas maiores de 25 anos adquiren a libre disposición das súas ganancias, fortuna e herdanza.

- 1858: Proudhon publica *De la justice*. Juliette Lamber publica *Idées antiproudhoniennes*.
- 1859: As universidades rusas admiten mulleres como lectoras. Darwin publica *On the Origin of Species by Means of Natural Selection, or the Preservation of Favoured Races in the Struggle for Life*. Morre a escritora alemá Bettina Brentano.
- 1860: Guerra civil nos Estados Unidos de Norteamérica. As universidades suízas comezan a admitir mulleres.
- 1861: Nace Lou Andreas Salomé, filósofa alemá e única muller aceptada na Sociedade Psicanalítica de Viena.
- 1864: Acta de nacemento da Asociación Internacional do Traballo (AIT), con seccións europeas e comité central en Londres. Nace Camille Claudel, quen chegará a ser unha importante escultora.
- 1864-1865: Abolição formal da escravitude nos Estados Unidos de Norteamérica.
- 1865: Abolição formal da servidume en Rusia. Fundación da Asociación Xeral Alemá de Mulleres.
- 1866: Na Internacional do Traballo dos Homes ábrese o debate sobre o traballo das mulleres. Publícase a obra de Julie-Victorie *La femme pauvre*.
- 1868: Emily Davies argumenta que, para a súa entrada na universidade, as mozas inglesas pasen polo mesmo exame que os mozos. En París un grupo de mulleres defende o dereito ao traballo para as mulleres. Publícase o primeiro xornal feminista portugués.
- 1869: Ábrense debates arredor da capacidade psíquica e mental das mulleres para a educación. John Stuart Mill publica *The Subjection of Women*. A antropóloga, filósofa e científica Clérence Royer publica *Origine de l'home et des sociétés*. O estado de Wyoming reconece o dereito das mulleres a votar. Morre María Victoria de Trevenot, filla do inventor da taquígrafía e primeira taquígrafa que coñece a historia.
- 1870: Nos EE UU apróbase á 15ª emenda; concede o dereito ao voto a homes negros e aos defensores dos dereitos da poboación afroamericana. En Europa e nos EE UU iníciase o denominado «Primeiro período do movemento feminista», cuxa data de remate se sitúa no caso dos EE UU en 1920 e de Europa en 1945. As universidades inglesas comezan a admitir mulleres. A abolicionista, activista social e poeta norteamericana Julia Ward escribe a «Proclama do Día das Nais», un apaixonado chamamento á paz e ao desarmamento mundial. Nace María Montessori, primeira muller en obter o título en Medicina en Italia.
- 1871: Créase a Primeira máquina simple para producir electricidade. Charles Darwin publica *The Descent of Man and Selection in Relation to Sex*. Creación da Unión de Mulleres. Fúndase a Sociedade de Mulleres Danesas. Fúndase a Comuna de París. Alemaña emerxe como a maior potencia mundial.

- 1872: Morre Mary Somerville, científica e matemática escocesa que apoiou e defendeu a emancipación e educación das mulleres.

-1873: Mulleres de 18 cidades estadounidenses realizan unha reunión do Día das Nais polos dereitos das mulleres e pola paz; este tipo de reunións seguiranse celebrando en Boston, cando menos durante unha década máis. Nace Sidonie Gabrielle, *Colette*, que chegará a ser escritora; parte da súa obra publícase co nome do seu marido. Morre a cubana Gertrudis Gómez de Avellaneda, escritora e loitadora contra a escravitude.

- 1874: Fúndase en Xapón a primeira escola normal para mulleres.

- 1875: Revolta de mulleres de Porto (Portugal) pola subida do prezo do pan. Nace a educadora americana de orixe rusa Mary Bethume Mc. Lear, quen será directora da División de Asuntos das Minorías Negras.

- 1876: Traslado da sede da AIT a Nova York. Bell patenta o teléfono. Morre Aurora Dupin, *George Sand*, escritora socialista francesa, fundadora da *Revue Indépendante* e da *Revue Sociale*.

- 1877: Nos EE UU aséntanse as bases do segregacionismo racial.

- 1878: Primeiro Congreso Internacional sobre os Dereitos das Mulleres. Nace en Viena a física Lise Meitner, codescubridora da fisión nuclear. Nace Marie Curie, quen descubrirá que a radioactividade é unha propiedade intrínseca da materia. Nace en Perú María Jesús Alvarado, quen co tempo se desenvolverá como escritora, xornalista e feminista.

-1879: Ferrocarril eléctrico en Berlín. August Bebel escribe *Frau und der Sozialismus*, obra en que toma en consideración as aspiracións sociais das mulleres dentro do movemento obreiro; con anterioridade, e salvo excepcións, eran consideradas seres incapaces. Pasamento da fotógrafa inglesa Julia Margaret Cameron, *Sra. Herbert Duckworth*.

-1880: Inicio do conflito palestino. As universidades francesas comezan a admitir mulleres.

- 1881: Fúndase en Milán a Liga Promotora dos Intereses Feministas (Liga Promotrice degli Interessi Femminile).

- 1882: Nace Virginia Woolf, quen chegará a ser considerada como unha das figuras máis destacadas da narrativa moderna inglesa.

- 1882-1884: Campañas do Movemento Sufraxista Británico polo recoñecemento do dereito de propiedade ás mulleres casadas.

- 1883: A antropóloga Alice Fletcher recoñece que as «omaha» perden o dereito ao seren propietarias ao se lles impor as leis occidentais. Pasamento da pintora impresionista francesa Eva Gonzalès.

- 1884: Publícase a obra de Engels *Der Ursprung de Familie, des Privateigentums und des Staats*. Theodore Stanton publica *The Woman Question in Europe*.
- 1886: O 1 de maio iníciase unha folga obreira na que se reclama a xornada laboral de oito horas, durará varios días e rematará co asasinato por parte do goberno americano de varios sindicalistas anarquistas.
- 1888: Exposición Internacional en París.
- 1889: No Congreso Obreiro Socialista celebrado en París tómase o acordo de celebrar o 1º de maio como Día Internacional dos Traballadores ou Día Internacional do Traballo.
- 1890: Conferencia Internacional do Traballo en Berlín.
- 1891: Segunda Internacional. Fúndase a Federación Abolicionista Internacional. Bertha von Suttner colabora na creación dun grupo pola paz en Venecia, inicia a Sociedade Austríaca pola Paz e comeza a crear un fondo para establecer a Oficina da Paz de Berna. Nace Fanny Livermore Asthonn, escritora que colaborou no *Agitator Woman's Journal*. Morre a matemática Sofía Kovalevskaya.
- 1893: Recoñecemento do dereito ao voto para as mulleres en Nova Zelandia. En Canadá fúndase o Consello Nacional de Mulleres de Canadá. A exploradora Mary Kingsley percorre o Congo Francés.
- 1894: Algúns estados australianos recoñecen o dereito ao voto das mulleres.
- 1895: Henrietta Leavitt comeza a traballar como voluntaria no observatorio de Harvard, traballará no establecemento da «secuencia do norte polar de magnitudes» adoptada polo Comité Internacional de Magnitudes Fotográficas. Pasamento da pintora impresionista francesa Berthe Morisot.
- 1896: Italia e Alemaña reparten entre elas Etiopía. Segundo Congreso Feminista Internacional en París. Morre a compositora e concertista austríaca Clara Schumann.
- 1897: Primeiro Congreso de Mulleres Checoslovas. Lydia Becker e Millicent Fawcett fundan a Unión Nacional de Sociedades de Mulleres Sufraxistas (National Union of Women's Suffrage Societies. NUWSS). Publícase en Francia *La Fronde*, primeiro xornal francés dirixido e escrito por mulleres e con continuidade ata 1903.
- 1898: Nace Teresa Neumann, que chegará a ser unha filósofa mística recoñecida. Primeira intervención norteamericana en Cuba.
- 1899: En Dinamarca as mulleres casadas conseguen a libre disposición da súa fortuna persoal. Créase o Consello Nacional de Mulleres Danesas.
- 1900: As universidades alemás comezan a admitir mulleres. A paleobotánica Marie C. Stopes explora Xapón en busca de flores de setenta millóns de anos de antigüidade. Morre

Mary Kingsley, antropóloga e naturalista afeccionada e autodidacta e que durante anos explorou diferentes partes de África. Pasamento da pintora rusa Tamara de Lempicka.

## Século XX

### 1901-1920

- 1901: Xeneralízase o dereito ao voto das mulleres en Australia; en Noruega as mulleres obteñen o voto municipal e o dereito a seren elixidas. A constitución aprobada o 21 de febreiro en Cuba deixa as mulleres sen dereito ao voto. Primeira cerimonia de entrega dos Premios Nobel de Literatura, Física, Química e Medicina. Publícase en Francia a primeira revista ilustrada dedicada integramente ás mulleres. Morre Eleanor Ormerod, destaca por desenvolver un novo campo de investigación: a entomoloxía económica.

- 1902: Outórgase o Nobel da Paz a Élie Ducommun e a Albert Gobat. Fúndase en Washington a Alianza Internacional para o Sufraxio Feminino.

-1903: Outórgaselles o Nobel de Física a Pierre Curie, Henri Becquerel e Marie Curie. Esta última convértese na primeira muller admitida na Royal Society. Primeira edición dos premios literarios Goncourt. En Gran Bretaña as sufraxistas forman a Unión Política e Social de Mulleres (Women's Social and Political Union. WSPU).

- 1904: Congreso Internacional de Mulleres da Federación Abolicionista Internacional en Berlín, centrado na loita polo sufraxio das mulleres. Morre Isabelle Eberhardt, exploradora anarquista suíza.

- 1905: Outórgaselle o Nobel da Paz a Bertha von Suttner. En Londres 50 000 obreiras desfilan contra o ministro Balfour. A alemá Christabel Pankurst é encarcerada por reclamar en público o dereito ao voto para mulleres. Ana de Castro Osorio publica o libro *Mulheres portuguesas*. Morre en Marsella a revolucionaria Louise Michel.

- 1906: En Finlandia concédese o voto ás mulleres. En Irán Mizar Hasan Khan é elixida parlamentaria. Outórgaselle o Nobel da Paz á baronesa Von Sutter. En Inglaterra as sufraxistas fan chamamentos de acción violenta para obter o voto. En Francia as sufraxistas propoñen non pagar impostos mentres non se consiga o dereito a voto. En Portugal créase o primeiro liceo para mulleres en Lisboa e publícase ata 1920 *O Jornal da Mulher*. Nace Josephin Baker, que chegará a ser cantante e bailarina e a formar parte da loita antirracista e antinazi. Morre Mary Jacobi Putman, pioneira da física e estudosa da anatomía.

- 1907: En EE UU Elizabeth Gurley Flynn organiza xunto con outras mulleres e homes o sindicato obreiro industrial Workers of the World. Celébrase en Stuttgart a primeira Conferencia da Internacional Socialista de Mulleres, nela désígnase presidenta do Secretariado Internacional desta nova organización a Clara Zetkin.

- 1908: Recoñecemento do dereito ao voto ás mulleres en Dinamarca. Convocadas pola WSPU, concéntranse 250 000 persoas en Hyde Park para reclamar o dereito das mulleres a votar. Créase a Liga Republicana das Mulheres Portuguesas (LRMP). Congreso de mulleres en San Petesburgo. Nace Simone de Beauvoir.

- 1909: Selma Lagerlöf é galardoada co Nobel de Literatura. Alexandra Kollontai publica *Sotsial'nye osnorry zhenskogo voprosa*. O 15 de febreiro obreiras do sindicato da confección de Nova York convocan unha xornada de loita no East Side, piden melloras nas condicións de vida e laborais, a eliminación do traballo infantil e o dereito ao voto. O último domingo de febreiro celébrase en EE UU o Día Nacional da Muller.

- 1910: Proclamación da República Portuguesa, decreto de abolición da nobreza. Na segunda Conferencia da Internacional Socialista de Mulleres propónse a celebración dun Día Internacional da Muller Traballadora. Fúndase a Liga Republicana das Mulheres Portuguesas. María del Carmen Corredoyra concorre á Exposición Internacional de Bellas Artes celebrada en Bos Aires. Morre Elisabeth Blackwell, primeira doutora en Medicina dos EE UU.

- 1911: Outórgaselle o Nobel de Química a Marie Curie. O 19 de marzo millóns de traballadoras europeas saen á rúa en lembranza das xornadas revolucionarias de marzo de 1948. O 25 de marzo morren calcinadas 146 obreiras encerradas na fábrica Triangle Shirtwaist de Nova York; numerosas protestas convocadas pola Liga Sindical de Mulleres percorren as principais cidades norteamericanas e europeas. A aparición dunha muller con saia-pantalón nun teatro de París provoca o escándalo. Créase en Xapón o Movemento Seito Sha de Liberación da Muller. Publícase en Portugal o primeiro número de *A Madrugada*, xornal da LRMP.

- 1912: Carolina Michaëlis de Vasconcelos e Maria Amália Vaz de Carvalho son nomeadas socias de mérito da Academia das Ciéncias de Lisboa. Fúndase en Cuba o Partido Nacional Feminista. En Massachusetts preto de mil mulleres péchanse na factoría en que traballan e maniféstanse na rúa reclamando igualdade salarial con respecto aos homes, difunden e asentan un lema cargado de simbolismo: 'pan e rosas' (seguridade económica e mellora na calidade de vida).

- 1913: Créanse en Cuba o Partido Sufragista e o Partido Nacional Sufragista. Un grupo de sufragistas voa con dinamita a casa de campo do chanceler británico Lloyd George. Morre Mathilde Marchesi, cantante e profesora de música en varios conservatorios europeos.

- 1914: Primeira Guerra Mundial, o 14% das súas vítimas serán civís. O presidente estadounidense Woodrow Wilson declara oficialmente o Día das Nais; significou unha crecente comercialización desta data e o esquecemento da proclama escrita por Julia Ward Howe en 1870 e que facía desta celebración un chamamento para a paz e o desarmamento internacional. A Alianza Internacional polo Voto da Muller (International Woman Suffrage Alliance), en nome de doce millóns de mulleres de 26 países, fai un manifesto que insiste entre outras cousas na necesidade de buscar vías dialogadas para afrontar os conflitos entre nacións. Participación activa de mulleres no seo da Segunda Internacional na defensa do pacifismo: Rosa Luxemburgo, Alexandra Kollontai. Mary Richardson, líder feminista

inglesa en folga de fame, é obrigada a alimentarse pola forza. Conferencia Internacional de Mulleres. Amnistía para as sufraxistas inglesas encarceradas por defender o dereito ao voto das mulleres.

- 1915: Reunión de mulleres socialistas contra a guerra en Berna, onde elaboran un documento contra a guerra. Fundación do Partido da Muller pola Paz (Woman's Peace Party) nos EE UU. Primeiro Congreso Internacional de Mulleres pola Paz na Haia.

- 1916: I Congreso Feminista Nacional en Yucatán (México). O grupo de Milán foi perseguido a consecuencia dunha petición a favor da paz que Rosa Geroni fixo circular en decembro. Pasamento da pintora impresionista francesa Marie Bracquemond.

- 1917: As mulleres ocupan un lugar destacado na Revolución Soviética e obteñen o dereito ao voto e a ser candidatas, o dereito ao divorcio, o acceso á educación universal e gratuíta, igual salario que os homes, o dereito ao aborto. Primeira muller ministra da historia. Seguindo fórmulas diferentes, concédese o voto ás mulleres en Holanda, Rusia, Alemaña, Austria, Checoslovaquia e Polonia. Grupos de mulleres pola paz comezan a ter boicots nos seus mitins. A espía holandesa Margar Gertrudis Zelle, *Mata-Hari*, é detida nun hotel de París.

- 1917-1918: Ten o seu auxe a Cruzada de Mulleres pola Paz en Inglaterra.

- 1918: Fin da Primeira Guerra Mundial. Faise difícil de crer, tal e como fixeran as sufraxistas, que as mulleres fosen unha forza de paz, se ben houbo mulleres resistentes á guerra, tamén as houbo cómplices. Recoñecemento do dereito ao voto ás mulleres de máis de 30 anos en Inglaterra. En Rusia celébrase o Primeiro Congreso das Mulleres Obreiras de Rusia, apróbase o código sobre o matrimonio, a familia e o coidado infantil, e o código do traballo, que recolle as primeiras medidas de conciliación familiar e de axuda á maternidade. Créase en Cuba o Club Femenino.

- 1919: Obtense en Dinamarca a igualdade de salarios entre homes e mulleres. Rosika Schwimmer é nomeada embaixadora. Creación da Organización Internacional do Traballo (OIT). Créase en Rusia o Zenotdel, departamento feminino de carácter governamental. Creación da Bauhaus en Alemaña. Primeira folga de obreiras en Medellín. Primeiro Congreso Internacional de Mulleres Traballadoras. Creación da Federación Canadense de Mulleres Universitarias. Creación da Asociación Internacional da Reconciliación (International Fellowship of Reconciliation). Andrea López Chao é elixida vicepresidenta segunda da sociedade Hijas de Galicia. Segundo Congreso Internacional de Mulleres pola Paz en Zürich, asisten mulleres de 16 países. Nace Casey Miller, que chegará a ser unha escritora pioneira na defensa dunha linguaxe non sexista. I Exposición de Arte Gallego en Bos Aires. A xornalista e revolucionaria alemá de orixe polaca Rosa Luxemburgo é asasinada polo exército alemán.

- 1920: As mulleres obteñen o dereito ao voto nos EE UU. Primeiras emisións de radio en EE UU e Francia (Radiola), en menos de 10 anos vaise converter nun dos máis importantes medios de comunicación. A pintora María Blanchard triunfa no Salón dos Independentes de París coa súa obra *La comuniente*. A francesa Adrienne Bolland cruza o Canal da Mancha

en avión; é a primeira muller que realiza esta travesía. Esmorece a Asociación Nacional da Muller Sufraxista (National Woman Suffrage Association. NWSA), asociación feminista radical independente de igrexas e de partidos políticos e fundada polas antropólogas Candy Stanton e Susan B. Anthony, entre outras. Julieta Lanteri preséntase ás eleccións de Arxentina polo Partido Feminista Nacional.

## 1921-1940

- 1921: Constitución da Federación de Sociedades Galegas en Bos Aires. Primeiras publicacións de prensa amarela en EE UU. Créase a Federación Nacional de Asociaciones Femeninas de Cuba. Olimpíada feminina en Montecarlo, organizada contra a rixida actitude do CDI, que restrinxe a participación das mulleres nas Olimpíadas e limita a súa indumentaria.

- 1922: Fuco Gómez funda na Habana o Comité Revolucionario Arredista Galego. Chegada do Fascismo ao poder en Italia. Publícase o *Ulises* de Joyce. Recoñecemento do dereito ao voto ás mulleres en Canadá. Morre a librepensadora e feminista francesa Nelly Roussel.

-1923: Oficialización do Nacional Socialismo en Alemaña. Tamén en Alemaña, nace a futura escultora Meier Dennighoff. Celébrase o Primer Congreso Nacional de Mujeres en Cuba.

- 1924: En Dinamarca noméase ministra a unha muller. Simone Weil e Simone de Beauvoir licéncianse en Filosofía.

- 1925: Sigmund Freud escribe o artigo «A cuestión da muller»; Karen Horney respóndelle. Primeiras emisións da BBC.

- 1926: Outórgaselle o Nobel de Literatura a Grazia Deledda. Celébrase o X Congreso da Alianza Internacional para o Voto das Mulleres.

- 1927: Morre a bailarina Isadora Duncan. Morre María Josefa Saavedra, primeira avogada boliviana. A Liga de Nacións publica *Report of the Special Body of Experts on Traffic in Women and Children*. A Universidade de Oxford restrinxe o número de mulleres admitidas como estudantes.

- 1928: As mulleres obteñen o dereito a votar en Gran Bretaña. Amelia Earhart, pioneira na aviación nos Estados Unidos de Norteamérica, fai a travesía do Atlántico. Morre a sufraxista inglesa Emmeline Pankhurst. Morre a escritora boliviana enfrontada aos conservadores Adela Zamudio.

- 1929: Crac bolsista de Nova York. Margaret Bondfield ocupa o cargo de ministra; é a primeira vez en Inglaterra que unha muller acada este posto. Virginia Woolf escribe *A room of One's Own*. A pintora Concha Vázquez Martínez participa na Exposición de Arte Gallego en Bos Aires.

- 1930: Celébrase o Primeiro Congreso de Mulleres de Oriente en Damasco. Existen en Cuba 320 asociaciónes de mulleres rexistradas de forma legal.

- 1931: Outórgaselles o Nobel da Paz a Jane Addams e a Nicholas Murray Butler. Fúndase a revista *Sur*, na que participan importantes escritoras e escritores deste século. Inaugúrase no Ateneo Feminino de Bos Aires a 1ª Exposición de Libros de Mulleres. Nace en Bos Aires Rosa Graciela Castagnola de Fernández Meijide, quen vai desenvolver un importante labor político.

- 1932: Nace Dian Fossey, que chegará a ser unha zoóloga especializada en gorilas.

- 1933: Antonieta de Barros é elixida deputada en Brasil; é a primeira vez que unha negra ocupa este cargo no país. Convención sobre os Dereitos do Home. Hitler chega ao poder en Alemaña. Congreso Internacional de Mulleres Antifascistas. Morre Clara Zetkin, dirixente comunista e feminista alemá.

- 1934: Hitler autoproclámase xefe do Estado e do Goberno alemán. En Noruega as mulleres poderán acceder a cargos oficiais do Estado e da Igrexa. Apróbase en Cuba o artigo 39 sobre o sufraxio feminino. Morre en París a dúas veces Premio Nobel Marie Sklodowska (de casada Marie Curie). Nace en México Nancy Cárdenas, que chegará a ser escritora. Morre a feminista inglesa Kate Sheppard. Morre a aviadora francesa Hélène Boucher. Morre Cecilia Grierson, primeira médica arxentina, hixienista e educadora.

- 1935: Outórgaselles o Nobel de Química a Irène Joliot-Curie e Frédéric Joliot. Créase en Venezuela a Unión Nacional de Mujeres, composta por mulleres do Partido Comunista e a Agrupación Cultural Femenina, a iniciativa de Lola Morales de Lara.

- 1936: Pacto antikomintern; Alemaña e Xapón contra a URSS e a Internacional Comunista. Golpe de estado do xeneral Metaxas en Grecia. Berta Lutz, unha das creadoras das bases do feminismo no Brasil, asume a acta de deputada no parlamento; as súas liñas de acción encamiñanse a mudar a lexislación laboral en relación ao traballo das mulleres e mais das crianzas. En Inglaterra Stella Browne, Dora Russell e outras mulleres socialistas forman a Asociación para a Reforma da Lei do aborto (ALRA). En Venezuela é promovida, entre outras, por Luisa del Valle Silva e Ada Pérez créase a Asociación Venezolana de las Mujeres. Maruja Mallo participa na Exposición Internacional do Surrealismo celebrada en Londres. María del Pilar e María del Carmen Álvarez de Sotomayor expoñen na Sociedade Nacional de Belas Artes de Lisboa.

- 1937: Hitler descobre os seus plans de conquista do mundo mediante a violencia. Italia adhírese ao pacto antikomintern. Guerra chinesa-xaponesa. Morre Edith Warton Hawbold, feminista, escritora e arquitecta. A Liga de Nacións autoriza a formación do Comité da Condición das Mulleres. Promúlgase a Constitución da República Irlandesa, na que se teñen en conta os dereitos das mulleres.

- 1938: O III Reich anexiona Austria. Conferencia de Múnic entre Hitler, Mussolini, Chamberlain e Deladier. Premio Nobel de Literatura para a norteamericana Pearl S. Buck.

- 1939: Pacto de non agresión xermano-soviético. Italia invade Albania. Alemaña ataca Polonia. Francia e Inglaterra declaran a guerra contra Alemaña. Comeza a Segunda Guerra Mundial, ao seu remate o 50% das vítimas son civís. Primeiros microscopios electrónicos en EE UU. En Suíza créase o insecticida antipragas DDT.

- 1940: Morre Emma Goldman, escritora e anarquista. En Venezuela celébrase a Conferencia Femenina Nacional co obxectivo de promover leis máis xustas para as mulleres.

## 1941- 1960

- De Gaulle crea en Londres un Comité Nacional de Franceses Libres.

- 1941: Comezo da guerra no norte de África. Pacto neutralidade URSS-Xapón. Pacto anglosoviético contra Alemaña. Bombardeo en Pearl Harbour. EE UU declara a guerra a Xapón, Alemaña e Italia. Firma da Carta do Atlántico entre Churchill e Roosevelt. Nace en Bulgaria Julia Kristeva, que chegará a converterse nunha figura destacada no mundo do pensamento francés, en concreto, e no do feminismo en xeral. Nace en Suecia Elfrida Andréa, que chegará a ser unha importante compositora e organista. A poetisa portorriqueña Julia de Burgos participa en seminarios públicos sobre a independencia de Porto Rico. Morre Virginia Woolf.

- 1942: Ghandi insta a Gran Bretaña para que abandone a India. Conferencia de ministros latinoamericanos en Río de Xaneiro. Decídese a intervención na guerra contra as potencias do eixe. Morre a fotógrafa Tina Modotti, que na Guerra Civil española (1936-1939) traballara coas Brigadas Internacionais. Nace Aretha Franklin, que chegará a ser cantante.

- 1943: Disolución do Komintern -Internacional Comunista-. «Revolta da rúa das Rosas» en Berlín, semana de actos de protesta de mulleres casadas con xudeus contra a detención dos seus maridos polo réxime nazi. A escritora Joyce Kussu participa na loita armada contra o nazi-fascismo en territorio italiano ata 1945 e acada o grao de capitán de reserva do exército. Morre Simone Weil, filósofa e escritora francesa, traballadora de empresa automobilística, que se alistara na Columna Durruti no 1936.

- 1944: Resistencia francesa e expulsión das tropas alemás de ocupación. Constitúese o Consello de Galiza en Montevideo. Representantes de varios países chegan a acordos para instaurar un sistema monetario e financeiro internacional e crean as bases de institucións financeiras: Fondo Monetario Internacional (FMI), Banco Mundial (BM), Organización Mundial do Comercio (OMC), Banco de Pagos Internacionais (BPI). Outórgase o Premio Goncourt á obra de Elsa Triolet *Le premier accroc coûté 200 Francs*.

- 1945: Fin da Segunda Guerra Mundial, no seu decurso moitas mulleres forman parte do Movemento de Resistencia na Loita contra o Nazismo. Capitulación do exército alemán. Lanzamento das bombas atómicas sobre Hiroshima e Nagasaki. Capitulación e desarmamento de Xapón. Proclámase a República Democrática de Vietnam. Fundación da Liga Árabe. Proceso de Núremberg. División do mundo en dous bloques. Recoñecemento

do dereito ao voto ás mulleres en Francia e Italia. A Royal Society admite como membros a: Marjory Stephenson e Kathleen Lonsdale. Outórgaselle o Nobel de Literatura a Gabriela Mistral. No mes de novembro, Placeres Castellanos acode ao Congreso Internacional de Mulleres celebrado en París representando a Marsella. Créanse en Italia a Unione della Donna Italiana e comisións de mulleres nos partidos políticos Morre María Lacerda de Moura, considerada como unha das pioneiras feministas brasileiras. Morre Odette Churchill, antifascista francesa, torturada pola Gestapo, internada no campo de Ravensbrück. Ana Frank morre asasinada polos nazis en Auswitch.

- 1946: Seis mulleres son elixidas membros do Parlamento xaponés. Outórgaselles o Nobel da Paz a Emily Greene Balch e a John R. Mott. No xuízo de Núremberg non se recoñece que a violación é un crime de guerra ou contra a humanidade. Na Arxentina apróbase a Ley de Derechos Políticos de la Mujer, inclúe o dereito ao voto.

- 1947: Inicio en EE UU da doutrina Truman (acción militar económica contra a expansión comunista). Programa de reconstrución europea (Plan Marshall). Proclamación de independencia da India. En Venezuela as mulleres obteñen o dereito ao voto e a seren elixidas. Gerty Cory é galardoada co Premio Nobel de Fisioloxía e Medicina polo seu traballo sobre o metabolismo dos hidratos de carbono. Nace Petra Kelly.

- 1948: Proclámase o estado de Israel en territorio palestino. Asasinato de Ghandi. Fundación da ONU e promulgación da actual Declaración Universal dos Dereitos Humanos, que contempla a igualdade entre os sexos. A ONU condena o réxime español e nega a entrada de España na organización. A socióloga holandesa Hilde Verwey-Jonker escribe que é perigoso aceptar que a guerra é asunto de homes e a paz de mulleres. A antropóloga Margaret Mead publica *Male and Female*, libro en que amosa empiricamente a arbitrariedade cultural da construción do masculino e do feminino. Morren a investigadora do metabolismo bacteriano Marjory Stephenson e a matemática Mileva Maric.

- 1949: Consello de Europa. Proclámase a República Popular de China. Separación da India e Paquistán. Créase a OTAN. A convención de Xenebra non recoñece a violación como crime de guerra ou contra a humanidade. Simone de Beauvoir publica *Le deuxième sexe*; este libro vai ser recoñecido como o impulso para o renacer do feminismo dos anos setenta, representado nos EE UU por feministas como Betty Friedan, Sulamith Firestone ou Kate Millet.

- 1950: A estas alturas do século XX o protagonismo das mulleres no movemento pola paz e o pacifismo nuclear é innegable. Recoñecemento do dereito ao voto ás mulleres en Xapón e no Quebec.

- 1951: Convención sobre o estatuto de refuxiados.

- 1952: Morre María Montessori, pedagoga italiana, primeira en conseguir a graduación médica. Galardoada co Premio Goncourt a obra de Beatrice Beck *Léon Morin, Prêtre*. Morre Victoria Ocampo, importante escritora arxentina, que chegara a ser nomeada Académica das Letras Arxentinas, é a primeira vez que unha muller ocupa ese cargo.

- 1953: Rosalind Franklin descobre a estrutura helicoidal da molécula do ADN.
- 1954: Premio Goncourt para Simone de Beauvoir polo seu ensaio *Mandarins* sobre a condición das mulleres. Morre Frida Kahlo.
- 1955: Fúndase en EE UU a rede de centros Hijas de Bilitis, integrada por feministas lesbianas. Promúlgase en Perú a Lei de Sufragio Femenino. Morre Milly Witkop Rooquer, anarquista rusa que escribiu unha importante obra sobre o sindicalismo.
- 1956: Primeiro Congreso da Emigración Galega en Bos Aires. 20 000 mulleres negras marchan en África do Sur contra a discriminación racial e sexual. Bette Nesmith Graham patenta o Tippex. Morre Irene Juliot-Curie, Premio Nobel de Física en 1935.
- 1957: Tratado de Roma. Creación da Comunidade Económica Europea (CEE).
- 1958: Fin da guerra de Corea e división do país en norte e sur. O 4 de setembro fúndase en Sierra Maestra o grupo «Mariana Grajales», pelotón militar de mulleres. Morre Rose Macaulay, antropóloga, poetisa e periodista inglesa, Premio Femina Via Hereuse.
- 1959: Triunfo da Revolución Cubana. A ONU subscribe a Convención sobre os Dereitos Políticos da Muller.
- 1959-1975: Guerra entre Vietnam do norte e Vietnam do sur, Xot únese á guerrilla contra a ocupación estadounidense.
- 1960: Ponse á venda a primeira pílula anticonceptiva, denominada «Enovid». Sirimavo Bandaranaike é nomeada primeira ministra de Sri Lanka, é a primeira vez que unha muller ocupa este cargo. Morre Melanie Klein, unha das mais importantes psicanalistas do século XX.
- Na década dos sesenta instálanse ordenadores só nalgúns institucións debido ao elevado custo dos equipos

## 1961-1980

- 1962: Asasinato de Luther King. Independencia de Alxeria. Creación da Conferencia das Mulleres Africanas con carácter cultural. Galardoada co Premio Goncourt a obra de Anna Langfus *Les bagages de sable*. Pasamento da pintora rusa do cubo-futurismo Natalia Goncharova.
- 1963: Congreso Mundial das Mulleres en Moscova. Outórgase o Premio Nobel de Física a Maria Goeppert-Mayer, Eugene Wigner e J. Hans D. Jensen. Betty Fridman publica *The feminine mystique*. A cosmonauta Valentina Vladimirovna Treshkova orbita a terra, farao noutras tres ocasións ao longo da súa vida.

- 1964: Margaret Chase presenta a súa candidatura á Casa Branca (EE UU). Liselotte Welskopf é a primeira muller que entra como membro de pleno dereito na Akademie der Wissenschaften de Berlín. Outórgaselle o Nobel de Química a Dorothy Crowfoot Hodgkin e o de Medicina (compartido) a Dorothy Crawford. Morre en Bos Aires María Miramontes.
  
- 1965: Créase en Xapón o Club Seikatsu, trátase dun grupo de nais preocupadas pola alimentación das crianzas.
  
- 1966: Pacto internacional sobre os dereitos civís e políticos. Indira Gandhi é elixida primeira ministra da India. Fúndase en EE UU a National Organization of Women, grupo de ideoloxía liberal do que forman parte Betty Friedan e Margaret Mead. Morre Margaret Sanger; a súa loita en favor do control da natalidade e do uso libre de anticonceptivos estimulou o movemento norteamericano de liberación da muller.
  
- 1967: A ONU proclama a declaración sobre a eliminación da discriminación contra a muller. Mulleres guineanas protestan pola discriminación na educación. Asasinato de Ernesto *Che* Guevara.
  
- 1968: Organización do Maio francés por estudantes e intelectuais e no que o movemento feminista ten tamén un importante lugar. Movements estudantís nos EE UU contra a guerra de Vietnam e a favor do pacifismo. Creación da coalición New York Radical Feminists. Creación en Berlín do Consello de Acción para a Liberación da Muller. Celebración do Primer Seminario para la Evaluación da Condición Femenina Venezolana. Créase en Suíza o Movemento para a Liberación da Muller (FBB en Zürich e MLD en Xenebra). Valerie Solanas publica *SCUM Manifesto (Society for Cutting Up Men)*. Morre Lise Meitner, quen investigara sobre a radioactividade e a física nuclear.
  
- 1969: Créase *arpanet*, núcleo da actual internet. Gran número de folgas de traballadoras portuguesas de diferentes sectores industriais ao longo de todo o ano. Créase en Chicago a Unión para a Liberación da Muller. En Nova York créase a Radical Feminista de Nova York (New York Radical Feminist), que organiza grupos de autoconciencia nomeados por Sarachild como *consciousness-raising*. Créase o Centro de Mulleres de Vancouver. Créase en Londres o Centro de Liberación da Muller. Créase en Inglaterra a revista *Shrew*. Sheila Rowbotham publica *Women's Liberation and the New Politics*. Lesbianas e gais enfróntanse á represión policial nos arredores de Stonewall In, bar de Nova York. Morre Alexandra David-Neel, feminista e exploradora francesa que elaborou un folleto feminista sobre os dereitos das mulleres no fogar; fora a primeira muller que chegou ao Tíbet en solitario.
  
- Na década de setenta emerxe a Teoría do Punto de Vista Feminista (Feminist Standpoint) da man de sociólogas e filósofas familiarizadas cos escritos de Marx, Engels e Luckas.
  
- 1970-1980: Invéntase a fibra óptica. As grandes mobilizacións dos grupos feministas céntranse no dereito ao aborto, no cumprimento da igualdade civil e educativa, contra a violación e o acoso sexual e o acceso a novos campos de acción.

- 1970: Primeiras manifestacións de mulleres en Xapón. En EE UU Kate Millet publica *Sexual Politics* e Sulamith Firestone *The Dialectic of Sex: A Case for Feminist Revolution*. En Italia créase Revolución Feminista (Rivolta Femmenile), feminismo da diferenza, e en relación con esta corrente publícase o libro de Carla Lonzi *Sputiamo su Hegel*. En Inglaterra celébrase a primeira Conferencia Nacional do Movemento pola Liberación da Muller. En Dinamarca créase o movemento Medias Vermellas. Morre en México Mará Lombardi, loitadora italiana perseguida polo fascismo.

- 1971: Créase o *e-mail*. Recoñecemento do dereito ao voto ás mulleres en Suíza. A Unión Suíza para a Legalización do Aborto (USDA) comeza unha campaña a prol da gratuidade e legalidade deste. Créase nos EE UU o Partido Feminista. En Alemaña un grupo de mulleres funda Loita Revolucionaria. Erin Pizzey, socióloga e xornalista inglesa, funda nas aforas de Londres a primeira residencia para mulleres maltratadas de toda Europa. Fúndase en Francia a organización Choisir la Cause des Femmes.

- 1972: A líder negra Ángela Davis, membro do Partido Comunista, é absolta da acusación de proporcionar armas a tres revolucionarios. Creación do Centro de Mulleres de Ottawa. Creación do Centro de Información Feminino en París. En Londres créase o Grupo Londiniense de Acción a prol do Aborto (WACC). Creación da Alianza de Acción das Mulleres, que ofrece información dos diferentes grupos de mulleres que se foron formando desde Novo México ata Alaska e desde Nova York a Los Ángeles. Creación en Bélxica do Grupo para a Responsabilidade Política da Muller, o Partido Feminista Unificado e Infor-Femmes. Créase en Italia o Movimento di Liberazione della Donna. Na súa obra *Sex, Gender and Society* a socióloga feminista Ann Oakley postula a distinción entre sexo e xénero. Publicación de *Novas cartas portuguesas*, considerado como o primeiro manifesto feminista portugués; as súas autoras, María Isabel Barreno, María Teresa Horta e María Fátima Velho (as tres Marías), son detidas e a publicación confiscada. Morren a física nuclear de orixe polaca María Goeppert-Mayer e a xenetista botánica e antinazi Elisabeth Schieman.

- 1973: Mobilizacións a prol do dereito ao aborto, en particular en Francia e Italia; en EE UU promúlgase a regulación xurídica e legal de tal dereito. Mary Daly publica *Beyond God the Father: Toward a Philosophy of Women's Liberation*. Créase en Nova York a Organización Nacional de Mulleres Negras. Créase en Montreal o Lugar das Mulleres. En Bélxica o Grupo de Busca e de Información Feminista publica a revista *Cahiers du Grif*. Créase en Roma La Magdalena, asociación cultural feminista e centro de investigación e documentación sobre a muller. En Xapón publícase a revista feminista de tendencia radical *Onna-Eros* (Muller-Eros). Rozsa Peter é nomeada primeira muller matemática da Academia Húngara das Ciencias. Tras o golpe de estado de Pinochet, Lily Traubman, laica, feminista e iniciadora do Grupo Socialista, trasládase a vivir a Kibutz. Helene Cixous publica *Portrait du Soleil*. Morre a sufragista inglesa Helen Pankhurst. Morre Elise Ottensen-Jensen, pioneira da educación sexual e da planificación familiar.

- 1974: Gro Harlem Brundtland, membro do Partido Laborista, é nomeada ministra de Medio Ambiente de Noruega. Revolución dos Cravos en Portugal, o 20 de maio mulleres portuguesas crean o Movimento pelo Divórcio. A Federación Democrática Internacional de Mulleres pide ante a ONU que 1975 sexa declarado como Ano Internacional da Muller. En

Etiopía, 3000 mulleres marchan ata o palacio do emperador Haile Selassie, reclamando mellores condicións de traballo. Primeira Conferencia das Nacións Unidas sobre poboación. A Conferencia das Mulleres Africanas define o seu obxectivo principal: a integración das mulleres na sociedade. D'Eaubonne, figura emblemática do movemento feminista francés e cofundadora en 1971 da Fronte Homosexual de Acción Revolucionaria (FHAR), cuña a noción de ecofeminismo. Juliet Mitchell publica *Psychoanalysis and Feminism. Freud, Reich, Laing and Women*. Annie Leclerc publica *Parole de femme*. Créase en Francia a Liga dos Dereitos da Muller. Créase a Fronte de Mulleres de Dinamarca. Tamén en Dinamarca publícase a revista *Kvinder*.

- 1975: Independencia de Angola. Lei de protección do emprego. O goberno portugués revisa o Concordato coa Igrexa católica de xeito que se permite o divorcio civil para os casamentos celebrados pola Igrexa. A ONU declara o 1975 como Ano Internacional da Muller e organiza en México a I Conferencia Mundial sobre a Muller, onde se inicia un prazo de dez anos para o desenvolvemento e a mellora da situación das mulleres no mundo. Gran manifestación de mulleres en Calcuta contra a tradición do dote porque provoca o asasinato de moitas nenas. Susan Brownmiller publica *Against Our Will: Men, Women and Rape*. En Perú créase a Comisión Nacional de la Mujer Peruana e declárase o Año de la Mujer Peruana. En Portugal o Movimento de Libertação das Mulheres fai a súa primeira convocatoria pública, as empregadas do fogar tamén se organizan e crean sucursais en todas as cidades. Creación do Partido Feminista Unificado en Francia e Bélxica. En Francia mulleres artistas forman o grupo Dialogue. En Inglaterra créase o Wires, centro de información nacional do movemento feminista. En Nova York miles de mulleres marchan pola avenida Broadway en demanda da igualdade de dereitos (ERA). En Irlanda nace un gran número de grupos feministas, como Mulleres Irlandesas Unidas (IWU) ou Acción, Información, Motivación (AIM). Créase en Venezuela a Comisión Femenina Asesora de la Presidencia de la República, unha de cuxas actividades é a convocatoria do I Congreso Venezolano de Mujeres. Danse os primeiros pasos para a creación do Comité de Madres de Desaparecidos de El Salvador. En Suíza a Alianza das Sociedades Femininas Suízas, fundada a comezos de século, volve cobrar impulso. Morre a filósofa xermano-estadounidense Hannah Arendt. Morre Doria Shafik, feminista, sufraxista e activista exipcia. Asasinato de Anna Mae Pictou Aquash, india canadense, membro activo do American Indian Movement e loitadora para que se introducise nas escolas unha educación bicultural.

- 1976: Remate da guerra de Vietnam. Catro mulleres entran a formar parte do goberno de Roma. Comezo da década das Nacións Unidas para a muller. Apróbase en Portugal unha constitución en que se declara a igualdade de dereitos entre homes e mulleres. Primeiro Tribunal Internacional de Crimes contra as Mulleres en Bruxelas do 4 ao 8 de marzo. Outórgaselles o Nobel da Paz a Betty Williams e Mairead Corrigan. No mes de setembro créase en Portugal a União de Mulheres Alternativa e Resposta. En Bélxica fúndase o Centro de Mulleres en Liexa. En Irlanda créase o Movemento de Mulleres para a Paz, formado por mulleres protestantes e católicas. En Roma créase a radio Donna. Morre a escritora inglesa de novelas de suspense Agatha Christie.

- 1977: Outórgaselles o Nobel de Medicina a Rosalyn Yalow, Roger Guillemin e Andrew V. Schally. En Portugal fúndase a Cooperativa Editorial de Mulheres. Festival feminista en

Holanda. En Zürich fúndase a Organización pola Causa da Muller (OFRA). En Suíza créase Isis, Centro de Información e Documentación no Movemento Internacional da Liberación da Muller. En Nicaragua créase a Asociación de Mujeres Nicaraguanas Luisa Amanda Espinoza. En Arxentina toman corpo en abril as Madres de Plaza de Mayo e meses máis tarde Abuelas de Plaza de Mayo. En París os días 19-20 de maio lévase a cabo un encontro para a formación da I Internacional Feminista; nos debates interviñeron: Partido Feminista Unificado Francés, Partido Feminista Unificado de Bélxica, Partido Feminista de Alemaña, os colectivos de Barcelona e Madrid e Organización Feminista Revolucionaria de Cataluña. No Quebec publícase o periódico feminista *Les Têtes de Pioche*.

- 1978: Despois das mobilizacións populares masivas dos anos 70, o goberno italiano regula a Lei do aborto. Publícase en Portugal o primeiro número da revista *Mulheres*. Pasamento da artista dadaísta alemá Hannah Höch

- 1979: Maria de Lurdes Pintasilgo toma posesión do cargo de primeira ministra de Portugal. Margaret Thatcher é elixida primeira ministra de Inglaterra e exercerá este cargo ata 1990. A ONU adopta a convención sobre a eliminación de todas as formas de discriminación contra a muller. O goberno francés regula por lei o aborto. Yvonne Choquet-Bruhat convértese na primeira muller membro da Académie des Sciences francesa. Outórgaselle o Premio Nobel da Paz á madre Teresa de Calcuta. Zillah Eiesenstein publica *Capitalist Patriarchy and the Case for Socialist Feminism*. Fúndase o partido de Los Verdes (Die Grünen) en Alemaña. Pasamento da pintora francesa de orixe rusa Sonia Delaunay.

- 1980: Independencia de Zimbabwe logo de vinte anos de guerra contra a supremacía branca. En Portugal noméase por vez primeira unha gobernadora civil, Mariana Calhau Perdigão. En Noruega Gro Brundtland é elixida primeira ministra. Indira Gandhi é nomeada presidenta da India. Conferencia Mundial do Decenio das Nacións Unidas para a Muller. Revisión do Plan de Acción de Copenhague (ONU). Organízase a conferencia «Mulleres e vida na terra» na cidade de Amherst coa finalidade de difundir ideas ecofeministas. Entra na Academia da Lingua Francesa Marguerite Yourcenar. As relacións entre feminismo, heterosexualidade e lesbianismo xeran divisións entre feministas materialistas. Morre María Antonia Barreto Aquino, militante anarquista do Movemento Libertario Portugués. Morre a revolucionaria cubana Celia Sánchez Manduley.

## 1981-1985

- Nas guerras que se van producir ao longo das décadas dos oitenta e noventa, un 80% son vítimas civís.

- 1981: Entrada en vigor da Convención sobre a Discriminación contra a Muller (ONU). Sandra Day O'Connor é nomeada xuíza na Corte Suprema de EE UU. Un grupo noruegués de mulleres pola paz no mes de xuño inicia unha marcha en Copenhague que chega a París no mes de agosto. Comezan a organizarse os encontros feministas de América Latina e O Caribe financiados pola «cooperación internacional»; no primeiro destes encontros xorde a proposta de facer do 25 de novembro un día de reflexión e denuncia contra as diferentes

formas de violencia contra as mulleres; desde 1982 e en diferentes puntos do planeta fanse celebracións, pero será na Conferencia Internacional da Muller, organizada por Terre de Hommes en maio de 1987, cando se declare oficialmente Día Internacional pola non Violencia contra a Muller, tamén chamado Día Internacional Contra a Violencia de Xénero. A actriz e política Melina Mercuri é nomeada ministra de Cultura en Grecia. Créase a Rede Europea de Mulleres. Iníciase a marcha de mulleres contra a OTAN, durará 13 anos. O debate feminista xira arredor de dúas grandes liñas: igualdade e diferenza.

- 1982: Outórgaselles o Premio Nobel da Paz a Alva Myrdal e a Alfonso García Robles. A petición de grupos feministas, en Francia establécese o 8 de marzo como día festivo. Tamén en Francia, créase a Axencia de Mulleres da Información. Mulleres israelís, tras decatarse da súa invisibilización nos grupos de paz mixtos, comezan a actuar pola súa conta. Grupos de mulleres nórdicas pola paz parten de Estocolmo nunha marcha ata Moscova. No mes de setembro 40 mulleres de Gales, do grupo Mulleres pola Vida e a Terra, xunto con algúns homes fan unha marcha desde Cardiff ata a base aérea da OTAN en Greenham Common, protestan pola decisión de instalar nela 96 mísiles nucleares de cruceiro e establecen campamento permanente; este campamento convértese en referencia do movemento pola paz e móntanse campamentos noutras bases; 250 mulleres bloquean as instalacións e houbo 34 detidas, o campamento foi desaloxado en maio, mais recolócanse constantemente; no mes de decembro fan unha cadea humana de abrazo á base; o campamento permanece na base ata o ano 2000. Confírmase que Alaide Foppa, escritora feminista de Guatemala, fora asasinada había dous anos polo goberno do ditador Romeo Lucas García. Masacre de mulleres labregas en El Petén (Guatemala). Morre Helena Wright, médica inglesa pioneira no control da natalidade.

-1983: Chegan os primeiros mísiles á base aérea da OTAN en Greenham Common e no mes de abril 70 000 persoas forman outra cadea humana arredor da base. Convención en Berlín por unha Europa desnuclearizada. Outórgaselle o Nobel de Medicina a Barbara McClintock. Morre a escritora portuguesa María Lamas. Nancy Harstock publica *El punto de vista feminista: desarrollando las bases para un materialismo histórico específicamente feminista*. Petra Kelly publica *Loitar pola esperanza. Sin violencia hacia un futuro verde*. Morre Leda Eafanelli. Morre May Picqueray, anarquista francesa encargada do periódico *Le Refractarie*.

- 1984: Convención en Perugia por unha Europa desnuclearizada. O Parlamento portugués aproba o proxecto sobre a despenalización do aborto. Adopción da recomendación relativa a accións positivas a favor das mulleres (ONU). A obra de Marguerite Duras *L'Amant* é galardoada co Premio Goncourt. Un grupo de artistas norteamericanas feministas crean o grupo Guerrilla Girls. A escritora feminista mozambicana Paulina Chiziane inicia a súa actividade literaria. Morre asasinada a primeira ministra da India, Indira Gandhi.

- 1985: Conferencia Mundial da ONU sobre as Mulleres en Nairobi; faise balance do conseguido nos diferentes países desde 1975. O Parlamento Europeo adopta no mes de marzo a Recomendación sobre a Violencia no Seo da Familia, no mes de decembro establece o Premio Sajarov para a Liberdade de Conciencia. A bióloga e filósofa feminista Donna Haraway publica o seu manifesto *Cyborg*. Luce Irigaray publica *This Sex Which Is Not One* e *Speculum: Of the Other Woman*. Morre Margaret Michaelis, fotógrafa austríaca,

realizou reportaxes durante a Guerra Civil española de 1936-1939. Morre Simone de Beauvoir. Pasamento da pintora e fotógrafa suíza Meret Oppenheim.

## 1986-1990

- 1986: A ONU adopta a recomendación da reunión de expertos sobre violencia no fogar e os seus efectos nas mulleres. O Parlamento Europeo adopta resolucións sobre as agresións á muller. Créase a Liga dos Dereitos das Mulheres Portuguesas. Morre Ada Rogato, a primeira aviadora de Brasil e de toda América do sur.

- 1987: Os presidentes de EE UU e URSS firman o Tratado para as Forzas Nucleares de alcance intermedio (Intermediate-range Nuclear Forces Treaty). Outorgan o Premio Nobel de Química a Jean-Marie Lehn, Donald J. Cram e Charles J. Pedersen. A Coordinadora Europea de Mulleres organiza o seminario Violência contra as Mulheres en Lisboa. Tamén en Portugal constitúese a Coordinadora Nacional de Mulheres. Celébrase en México o I Encontro Lésbico-Feminista.

- 1987-1993: Primeira Intifada e en Israel créanse numerosos grupos de mulleres a favor da paz.

- 1988: Benazir Bhutto é elixida xefa do goberno de Paquistán; é a primeira muller que ocupa este cargo nun país islámico. Manifestación antinuclear fronte á embaixada francesa en Bonn. Outórgaselles o Nobel de Medicina a Gertrude B. Elion, Sir James W. Black e George H. Hitchings. Créase en Israel Mulleres de Negro (Women in Black), rede mundial de mulleres contra a guerra, a violencia e o militarismo, que neste ano se manifestan contra a ocupación militar israelí e constrúen pontes de paz coas mulleres palestinas. As mulleres da Asociación pola Paz de Italia deciden constituírse como Mulleres de Negro. O 12 de setembro constitúese en Guatemala o grupo CONAVIGUA, composto por mulleres de orixe maia contra a violencia xeneralizada impulsada polo exército contra comunidades indíxenas. Créase a Associação Portuguesa de Mulheres Juristas. Morre María Teresa de León, escritora republicana comprometida contra a guerra.

- 1989: Adopción por parte da ONU da Convención sobre os Dereitos do Neno. Caída do Muro de Berlín. Progresiva disolución da Unión de Repúblicas Socialistas Soviéticas. Inicio dun proceso de diálogo entre mulleres israelís e palestinas en Bruxelas. A xornalista e escritora Nelida Piñón pasa a formar parte da Academia Brasileira de Letras. Alice Echols publica *Daring to Be Bad: Radical Feminism in America, 1967-75*.

- 1990: Entrada en vigor da Convención sobre os Dereitos do Neno. Mary Robinson é elixida presidenta de Irlanda. Margaret Thatcher dimite como primeira ministra do Reino Unido. Outórgaselle o Premio Sajarov a Aung San Suu Kyi, activista e líder birmana contra a violencia. Marcha pola Paz en Xerusalén, que congrega a mulleres israelís, palestinas, americanas e europeas. Myrna Mack é asasinada por un comando do Estado Mayor Presidencial de Guatemala.

## 1991-1995

- Uso da categoría de xénero para analizar a organización social das relacións entre os sexos e as relacións desiguais de poder. Insístese no carácter relacional da dita categoría e en que non debe nin pode identificarse xénero con mulleres.

- Nos anos noventa, coa presión de mulleres de África e de todo o mundo, as axencias de Nacións Unidas logran colocar o problema da ablación nas axendas da saúde e dereitos humanos das mulleres. Poténciase o uso do ordenador e da internet como elemento de comunicación. Xeneralízase o uso da telefonía móbil.

- 1991: Referendo pola independencia de Croacia. Tim Beiners-Lee crea en Suíza a World Wide Web (www). Guerra do Golfo. O Partido das Mulleres (Zest) de Belgrado fai un chamamento á responsabilidade histórica dos distintos parlamentos ante os conflitos. Constitúese tamén en Belgrado o Parlamento de Mulleres o 8 de marzo como resposta á baixísima presenza delas no Parlamento oficial, 1,6%. Constitúense Mulleres de Negro en Italia contra a guerra do Golfo Pérsico. En Belgrado e Pancevo fórmanse grupos de Mulleres de Negro contra a Guerra (Zene u Crnom Prativ Rata). Nadine Gordimer é premiada co Nobel de Literatura. A xornalista e feminista Susan Faludi é galardoada co Premio Pulitzer e publica *Backlash: the undeclared war against American women*. Naomi Wolf publica *Beauty Myth*. Morre Ruth Badvin Cowan, correspondente de guerra durante a Segunda Guerra Mundial. Morre a actriz alemá Marlene Dietrich.

- 1992: Entre as conclusións da conferencia internacional celebrada en Praga sobre Mulleres de Europa do Leste, inclúese o acordo de que a violación é considerada crime de guerra. No mes de novembro mulleres do grupo Tresnjevka de Zagreb informan aos medios de comunicación da existencia de campos de violación e morte nos territorios ocupados de Bosnia-Hercegovina e Croacia e inclúen unha lista detallada de lugares de localización. Declaración de Atenas, na que as mulleres amosan o seu interese en firmar un novo contrato social e en establecer, dunha vez para sempre, unha democracia paritaria. Concédese o Nobel da Paz a Rigoberta Menchú, activista a favor dos dereitos humanos e das mulleres indíxenas. Outórgaselles o Premio Sajarov ás Madres de Plaza de Mayo e o Premio Cervantes á cubana Dulce María Loynaz. Morre a loitadora feminista Petra Kelly. Morre a poeta feminista lésbica e negra Audre Lorde. A loitadora social peruana María Elena Moyano é asasinada por Sendero Luminoso.

- 1993: A ONU adopta a Declaración da Eliminación da Violencia contra as Mulleres. Levase á conferencia polos dereitos humanos celebrada en Viena a petición de que a violación sexa considerada crime de guerra. No mes de xaneiro, Amnistía Internacional publica un informe sobre violacións e abusos sexuais en Bosnia-Hercegovina. Con motivo da Conferencia das Nacións Unidas sobre os Dereitos Humanos celebrada en Viena, o Foro Mundial das ONG desenvolve a súa campaña co lema «Os dereitos das mulleres son dereitos humanos». Cerca de 600 mulleres maniféstanse diante da sede das Nacións Unidas de Xenebra para protestar polas violacións de mulleres de Bosnia-Hercegovina cometidas polas tropas serbias e croatas e piden que estes actos sexan considerados «crimes contra a humanidade». Similar pedido formulan as mulleres en Alemaña e Italia.

- 1994: Declarado Ano Internacional da Familia pola ONU. Tamén esta organización nomea un responsable en temáticas de violencia contra a muller e celebra a Conferencia do Cairo. Xenocidio en Ruanda: 800 000 mortes en cen días, estímase que o 2,3 % dos perpetradores son mulleres. En Sudáfrica grupos de mulleres forman unha federación antiapartheid. Matanza no mercado de Saraievo, que remata coa guerra da antiga Iugoslavia. Posteriormente a ONU intervéñ no conflito. Asemblea xeral do Lobby Europeu de Mulheres en Lisboa. A xinecóloga, columnista e novelista Talisma Nasrin recibe o Premio Sajarov.

-1995: Marina da Silva é nomeada ministra do Medio Ambiente de Brasil. O Premio Sajarov é outorgado á escritora kurda Leyla Zana. Marcha «Pan e rosas» de dez días contra a pobreza no Quebec. Cuarta conferencia da ONU sobre as mulleres en Beijing co lema «A igualdade –legal e real– entre homes e mulleres é un dereito básico»; paralelamente, lévase a cabo unha conferencia alternativa de mulleres de todo o mundo, que supera en número ás participantes na conferencia oficial e á que asisten unha gran cantidade de mulleres feministas; acórdase comezar a deseñar un proxecto para que as mulleres de todo o mundo se unan ao longo do ano 2000 na MMM (Marcha Mundial das Mulleres). No informe do proxecto «Mulleres e Guerra», realizado polo Panos Institute, recóllense máis de douscentos testemuños de mulleres de 12 países onde houbo guerra ou confrontacións armadas. No VII Encuentro Feminista de Cartagena (Chile) confróntanse feministas institucionais e autónomas.

- A mediados dos anos noventa, calcúlase que no mundo hai arredor de cen millóns de persoas refuxiadas e desprazadas internas, das que o 80% son mulleres e nenos.

## 1996-2000

- 1996: Créase en Colombia o grupo Mujeres Resistiendo por la Vida. Outórgaselle o Nobel de Literatura á polaca Wislawa Szymborska. Nélide Piñon é nomeada presidenta da Academia Brasileira das Letras. Roberta Hamilton publica *Gendering the Vertical Mosaic: Feminist Perspectives on Canadian Society*. Morre a escritora e cineasta Marguerite Duras.

- 1997: A ONU declara o primeiro decenio para a eliminación da pobreza. O Parlamento Europeo adopta unha resolución sobre a tolerancia cero ante a violencia contra as mulleres. Co apoio político e económico do Consello Nórdico dos Ministros, UNESCO, UNICEF e o Consello de Europa, lévanse a cabo seis conferencias nórdicas e internacionais sobre os roles e valores masculinos e femininos. Salima Ghezali, directora do semanario *La Nation*, é galardoada co Premio Sajarov. Nun artigo de dúas investigadoras suecas publicado na revista *Nature* móstrase que os homes teñen o dobre de oportunidades de conseguir bolsas posdoutorais. Tres mulleres pacifistas entran na fábrica da British Aerospace, inutilizan compoñentes armamentísticos de avións militares e penduran pancartas denunciando a matanza de Santa Cruz no Timor Leste en 1991. Creación de Mulleres pola Paz de Nepal. Mulleres israelís e palestinas promoven a campaña «Compartir Xerusalén: dúas capitais para dous estados». A francesa Laurence de la Ferriere chega ao Polo Sur en solitario. Lucy Roberts, Croline Hamilton, Pam Oliver e Zoe Hudson chegan ao Polo Norte.

- 1998: A ONU adopta o Estatuto da Corte Penal Internacional (xulga crimes contra a humanidade, xenocidios e crimes de guerra). O Parlamento Europeo fai un chamamento á comunidade internacional en apoio ás mulleres afganas. Radhika Coomaraswamy, relatora especial de Nacións Unidas sobre a Violencia contra as mulleres, resalta a participación de mulleres nos exércitos insurxentes e que as mulleres comezan a ser acusadas de crimes de guerra. Cerca de tres mil mulleres chilenas realizan unha gran marcha para repudiar o acceso de Pinochet a unha senadoría vitalicia. Outórgaselle o Nobel de Economía a Amartya Sen. Encontro preparatorio da MMM no Quebec coa participación de 140 mulleres de 65 países; realízase unha análise das mulleres no mundo e concrétase unha plataforma reivindicativa para loitar contra a pobreza e a violencia.

- 1999: Foro Social Mundial en Seattle. Conferencia de París o 17 de abril. Directriz europea da paridade como principio democrático fundamental. Desenvólvese en Gran Bretaña o proxecto Athena, ten a finalidade de promover a presenza de mulleres na ciencia, na enxeñaría, na tecnoloxía, na educación superior e na investigación. Constitución da Plataforma Europea da MMM.

- 2000: A Asemblea Xeral das Nacións Unidas xúntase en Nova York co lema «Igualdade de xénero, desenvolvemento e paz para o século XXI» para facer balance da implementación da plataforma de acción de Beijing. Foro Social Mundial en Porto Alegre. Conferencia Nacional pola Paz de Somalia en Arta, Djibuti. I Folga Mundial de Mulleres «Paremos o mundo para cambialo». Articúlase en Brasil a primeira Marcha das Margaridas en homenaxe à ex-líder sindical Margarida Maria Alves, asasinada en 1983, na porta da súa casa, por latifundistas. Convocatoria da Plataforma Europea da MMM en Bruxelas (14 outubro) e da Plataforma Mundial en Washington (15 outubro) e Nova York (17 outubro). A Organización Femenina Popular e a Ruta Pacífica de las Mujeres de Colombia acordan constituír un grupo de Mulleres de Negro, estanse a dar os primeiros pasos da Ruta Pacífica de las Mujeres Colombianas. Morre a fotógrafa húngara Kati Horna. Morre a anarquista italiana Luce Fabbrì, responsable da revista *Studi Sociali*, editada en Montevideo.

## Século XXI

### 2001-2005

- 2001: Galardoada co Premio Sajarov a profesora universitaria israelí Nurit Peled. Galardoada co Millenium Peace Prize for Women a Ruta Pacífica de las Mujeres Colombianas. Créanse grupos de Mulleres de Negro en Tokyo. Morre Emilie Schindler, responsable, xunto co seu marido, da salvación de máis de 1200 xudeus durante a II Guerra Mundial.

- 2002: O grupo de Helsinki sobre Mulleres e Ciencia, despois de estudar a situación dos 15 estados membros da UE, pon de manifesto que a presenza de mulleres na investigación científica diminúe a medida que se ascende nos cargos de decisión e responsabilidade. Marcha de mulleres polo deserto de Chihuahua (México) ata Ciudad Juárez, reclamando

xustiza para as mulleres desaparecidas e asasinadas desde 1993. En Colombia o Movemento de Mulleres contra a Guerra organiza unha marcha en que participan 40 000 mulleres.

- 2003: Nina Pacarí, integrante do goberno de Ecuador desde 1997, asume o cargo de Ministra de los Negocios Extranjeros, sendo a primeira vez nese país que unha muller asume este cargo. Outórgaselle o Nobel da Paz á avogada e activista iraniana Shirin Ebadi. Créase en Coimbra a Rede Lilás. Mobilizacións de grupos de mulleres con participación activa da MMM nas diferentes mobilizacións en contra da guerra de Iraq. Reunión internacional de Mulleres de Negro en Marina di Massa (Italia). É encarcerada Aung San Kyi, fundadora da Liga Nal para a Democracia Birmana. Un mozo exaltado queima viva a moza de 18 anos Sohane Benziane. Morre Monique Wittig, escritora e teórica feminista francesa. Morre a actriz estadounidense Katherine Hepburn.

- 2004: O Tribunal Internacional contra Crimes de Guerra réunese en Tokyo para xulgar os crimes levados a cabo polo exército xaponés contra as mulleres durante a Segunda Guerra Mundial. O Premio Nobel de Medicina recae en Linda B. Buck e Richard Axel; o da Paz en Wangari Maathai. Convocatoria da Plataforma Europea da MMM na cidade de Vigo. Morre Susan Moller Okin, unha das teóricas feministas máis destacadas do século XX. Morre a novelista, ensaísta e activista Susan Sontag.

- 2005: Ano Mundial de Física. O goberno israelí desaloxa colonias xudías de Gaza. Aprobación da Carta das Mulleres. Outórgaselles o Premio Sajarov ás Damas de Blanco de Cuba e á avogada nixeriana Huawa Ibrahim. Ellen Johson é nomeada presidenta de Liberia, é a primeira muller que desempeña ese cargo nun país africano. Morre a escritora e activista feminista Andrea Dworkin.

2006...

- 2006: Ano Internacional dos Desertos e da Desertización. Montenegro declara a súa independencia de Serbia. Michelle Bachelet é a gañadora das eleccións presidenciais chilenas; Evo Morales, das bolivianas. Tarja Halonen é reelixida Presidenta de Finlandia. Entre os días 15 e 19 de novembro celébrase en Gana un Fórum Feminista Africano; nel apróbase unha Carta de Principios Feministas co compromiso de loitar pola erradicación do patriarcado en África. Na casa de María Casares en La Vergne créase La Maison du Comédien Maria Casarès. O Parlamento de Bosnia-Herzegovina recoñece que as mulleres violadas polos militares serbios entre 1990 e 1992 son tamén vítimas de guerra. Morren: Betty Friedan, precursora do movemento feminista; Iris Marion Young, unha das teóricas feministas máis destacadas do século XX; a compositora rusa Galina Ustvolskaya; e a activista estadounidense Coretta Scott King.

- 2007: É declarado Ano Internacional da Heliofísica. Ano Europeo da Igualdade de Oportunidades para Todas e Todos. Cristina Fernández vence nas eleccións presidenciais arxentinas. Frances Allen recibe o Premio Turing (de informática), é a primeira vez que unha muller recibe este galardón. Galardoada co Nobel de Literatura Doris Lessing. Obras de artistas feministas dan corpo a exposicións no Museum of Contemporary Art de Los

Ángeles e no Brooklyn Museum de Nova York. Publícase en Portugal a revista *Faces de Eva*. Centenario do nacemento de Frida Kalo. Morren: Grisélidis Real, escritora, prostituta, poetisa e defensora dos dereitos das prostitutas; a política ecuatoriana Guadalupe Larriva; a activista sudafricana Adelaide Tambo; a escritora infantil en idioma bengalí Leela Majumdar; e a matemática americana Emma Lehmer.

- 2008: É declarado Ano Internacional da Pataca. Kosovo fai unha declaración formal de independencia. Fidel Castro renuncia á xefatura do Estado cubano. Gloria Rubin e Lilian Soto son confirmadas respectivamente como ministra da muller e encargada do traspaso na Secretaría de la Función Pública de Paraguai. Eleccións presidenciais nos EE UU, resulta elixido Barack Hussein Obama; é a primeira vez que un negro acada este posto. Baixo o lema «La igualdad no es una utopía», celébrase en Madrid a X edición do encontro internacional Mundos de Mujeres 2008. Despois de oitenta anos sen celebrar encontros deste tipo, organízase un Congreso Feminista en Lisboa. XI Encuentro Feminista Latinoamericano y del Caribe. A científica Françoise Barré-Sinoussi comparte con outros dous investigadores o Nobel de Medicina. Morre María Gabriela Llansol, feminista e unha das escritoras máis innovadoras da ficción portuguesa contemporánea. Pasamento de: a última falante nativa e xefa da tribo eyak, Marie Smith Jones; a activista polaca Irena Shendler; a activista arxentina Alicia Zubasnabar de la Cuadra; a activista chilena Otilia Vargas; e, a activista feminista do Oriente Medio Maha Nasar.